

31-Dae

Woordgebede

Vir die kerk en gemeenskap

INDEKS

1	Bid die Woord	3
1.1	Hoekom ons die Woord moet bid	3
1.2	Hoe om die Woord te bid	4
2	Hoe om 'n uur in gebed deur te bring	5
2.1	Soek My aangesig (Psalm 27:8)	5
2.2	Die uur wat die wêreld verander	9
3	31 Woordgebode	14
3.1	Seën ons gemeenskap	14
3.2	Ons verhoog U Naam	14
3.3	God se genade en barmhartigheid	15
3.4	Ons aanbid U	15
3.5	Vir U genade en barmhartigheid	16
3.6	Vir die genesing van ons land	17
3.7	Belydenis vir bloedvergiëting	17
3.8	Belydenis vir afgodery	18
3.9	Belydenis vir onreg en gebroke verbonde	18
3.10	Belydenis vir onsedelikheid	19
3.11	Stort U Gees oor ons uit	20
3.12	Laat alle mense U Stem hoor	20
3.13	Vir verhoudings in die kerk	21
3.14	Die bloed van Jesus Christus	22
3.15	Vir die kerk om God se doel te bereik	22
3.16	Vir die vrees van die Here	23
3.17	Vir U plan vir gesinne en kinders	24
3.18	Vir Genesing deur Christus	24
3.19	Vir Vervolging en lyding	25
3.20	Vir ons Regering	25
3.21	Om vervul te wees met U Woord	26
3.22	Om die Bose te Weerstaan	27
3.23	Vir die openbaring van die Vaderskap van God	27
3.24	Vir die redding van ongelowiges (die wat nog ongered is)	28
3.25	Vir U koninkryk om te kom	28
3.26	Verlos ons van die Bose	29
3.27	Vir die armes en behoeftiges	29
3.28	Vir die kerk	30
3.29	Vir die kerk	31
3.30	Vir die kerk	31
3.31	Jesus Christus, ons Advokaat by God	32
4	Bid die Name van God	33
4.1	Name van God die Vader	33
4.2	Name van God die Seun	34
4.3	Name van God die Heilige Gees	35

1 Bid die Woord

Hudson Taylor het gesê: "Ons (Christene) is bonatuurlike mense, weergebore deur 'n bonatuurlike geboorte, aangedryf deur 'n bonatuurlike krag en gevoed deur bonatuurlike voedsel, geleer deur 'n bonatuurlike leermeester uit 'n bonatuurlike Boek." E.W.Kenyon het gesê: "Vas en lang ure van gebed bou nie geloof nie.....om boeke te lees oor geloof en manne van geloof en hulle prestasies wek 'n sterk begeerte na geloof, maar dit bou nie geloof nie. Die Woord alleen is die bron van geloof." Andrew Murray het gesê: "'n Bietjie van die Woord met 'n bietjie gebed is dodelik vir die geestelike lewe. Baie van die Woord met 'n bietjie gebed gee 'n sieklike lewe. Baie gebed met 'n bietjie van die Woord gee meer lewe, maar sonder standvastigheid. 'n Volle maat van die Woord en gebed elke dag gee 'n gesonde en kragtige lewe."

Die geloof kom dus deur die prediking wat 'n mens hoor, en die prediking wat ons hoor, is die verkondiging van Christus. (Rom.10:17) As 'n mens nie glo nie, is dit onmoontlik om te doen wat God wil. Wie tot God nader, moet glo dat Hy bestaan en dat Hy dié wat Hom soek, beloon. (Heb.11:6) En omdat God aan die erfgename van die belofte bo alle twyfel wou verseker dat Sy besluit onveranderlik is, het Hy dit met 'n eed gewaarborg. (Heb.6:17)

God kan nie ontrou aan Sy Woord wees nie. God openbaar Homself deur Sy Woord. Hy wys Sy karakter vir ons deur Sy Woord. Die beloftes in die Woord is in lyn met Sy wese en Sy karakter, waaraan Hy nooit ontrou kan wees nie.

1.1 Hoekom ons die Woord moet bid

Wanneer ons die gesag van die Woord en die posisie van die Woord in ons lewens verstaan, sal ons die Woord wil bid. Die volgende is enkele redes hoekom ons die Woord moet bid:

- God maak Sy wil in die Woord bekend. Wanneer ons die Woord bid, bid ons die wil van God en wanneer ons volgens die wil van God bid, sê die Woord dat ons gebede beantwoord sal word. (1Joh.5:14-15)
- Sekulêre boeke verskaf kennis en insig, maar dit is net wanneer ons die Woord lees, dat ons tot geloof kom. Wanneer ons die Woord bid, raak die geloof in ons harte meer. (Rom.10:17)
- Die Woord/Skrif openbaar God se prioriteite. Wanneer ons volgens die Woord bid, leer ons wat hierdie prioriteite is en kan ons ons lewens by hierdie prioriteite aanpas.
- Die Woord het gesag. Toe God die Vader die Heelal geskep het, het Hy dit deur Sy Seun, die Woord, gedoen. Die Woord het 'n woord gesprek en daar was lig en lewe en mense en hemelse liggame. Wanneer ons die Woord proklameer, word dit 'n aankondiging in die geestelike koninkryk - die Woord het steeds

dieselfde krag. Wanneer ons tot die Lewende Woord bid, het dit die krag om te skep en te herskep.

- Die Woord leer ons van God, Sy karakter, Sy wese, krag, vermoëns en karaktereenskappe. Wanneer ons God beter verstaan, kan ons met meer geloof bid. Geloof is so sterk soos die persoon in wie jy glo.

1.2 Hoe om die Woord te bid

Enige van die volgende maniere om te bid kan individueel, korporatief of in 'n 24/7 gebedskamer gebid word:

- **Lees die Woord:** Die maklikste manier om die Woord van God te bid is om dit eenvoudig hardop te lees (proklameer, bely, verklaar die Woord) van Genesis tot Openbaring.
- **Psalms:** Die vroeë kerk het groot klem geplaas op die bid van die Psalms. In die Psalms is al die verskillende vorme van gebed, soos verering, aanbidding, lof, verootmoediging voor God, smeking, intersessie, geestelike oorlogvoering en profesie. Dit is deur die bid van die Psalms (hulle het dit hardop, op hulle knieë gebid) dat die vroeë kerk genoeg geloof gekry het om na die heidengemeenskappe uit te reik met die evangelie van verlossing.
- **God se beloftes:** Daar is talle beloftes oor baie situasies, omstandighede en kwessies in die Woord van God. Deur hierdie Skrifte te lees, daaroor te mediteer en te proklameer, vermeerder ons geloof en dit help ons om te verstaan hoe God wil hê ons in verskillende omstandighede moet optree. Dit help ons om met wysheid en kennis te bid en in te tree, eerder as vanuit vrees en angs.
- **God se wil en Sy opdragte:** Deur die Woord te lees, ontdek ons God se opdragte, Sy wil en Sy mandaat aan Sy kerk in die wêreld. Bou jou gebede uit die Skrif rondom hierdie opdragte en mandaat.
- **Profesieë:** Die Woord van God is vol profesieë wat nog vervul moet word; profesieë rondom onself, ons gesinne, ons volk en God se oogmerke in die eindtyd. Ons moet hierdie profesieë in vervulling bid.
- **Vers na vers:** Wanneer jy die Woord lees kan jy elke vers wat tot jou hart spreek, verander in 'n persoonlike gebed vir geestelike groei, fisiese of emosionele genesing. Vestig jou gedagtes op hierdie lewegewende woorde eerder as op probleme of wêreldse kwessies. Verander die Woord van God in gebede en bid Sy Woord terug na Hom.

Oordenking: Lees die Woord hardop of saggies met die doel om 'n ontmoeting met God te hê. Wanneer jou gees in geloof Sy teenwoordigheid ervaar, gee die Heilige Gees dadelik geleentheid om jou dieper in bepeinsing en oordenking van die Persoon van God te neem. Vertoef daar in Sy teenwoordigheid. Soms kan hierdie gebed sonder woorde 'n meer diepgaande effek op ons en ons wêreld hê as baie gebede wat ons vanuit ons gedagtes bid.

2 Hoe om 'n uur in gebed deur te bring

Model 1

'n praktiese gids oor hoe om vir een uur te bid

2.1 Soek My aangesig (Psalm 27:8)

1. Soek My aangesig deur My Naam aan te roep (5 min)

Jahwe, die bron van alle standvastigheid en bemoediging (Rom.15:5), God van medelye, genadige God (Eks.34:6), El-Shaddai (die Algenoegsame; die Almagtige) (Gen.17:1), Jahwe-Jire (Die Here wat voorsien) (Gen.22:14), Jahwe-Rofeka (die Here wat jou gesondhou) (Eks.15:26), Jahwe-Shalom (die Here gee rus/vrede) (Ps.35:27), die Koning van die hele wêreld (Mig.4:13) Jesus Christus is die weg, die waarheid en die lewe (Joh.14:6), Hy is die krag en die wysheid van God (1 Kor.1:24), die Lam in die middel van die troon (Openb.7:17), die Lam wat geslag is (Openb.5:12), die hoop van God se heerlijkheid (Kol. 1:27); die Gees van vrymaking, insig, raad en sterkte, kennis en eerbied vir die Here (Jes.11:2), genade en smeking, heiligheid, liefde, waarheid, krag, selfbeheersing, wysheid en openbaring van die kennis van God, die Gees van heerlijkheid.

2. Soek My aangesig deur vir persoonlike herlewing te bid (5 min)

Vra jousef die volgende vrae:

- Is daar onbelyde sonde in my lewe?
- Het ek onvergewensgesindheid en bitterheid in my lewe?
- Is daar enige twyfelagtige praktyke of aktiwiteite in my lewe?
- Gehoorsaam ek die Heilige Gees dadelik in alle dinge?
- Bely ek Jesus onbeskaamd?

3. Soek My aangesig namens ongeredde familie, vriende of individue (5 min)

1. _____

2. _____

3. _____

4. _____

5. _____

Bid vir hulle redding, dat die Here hulle sal seën (geestelik, sosiaal en emosioneel), en bid vir hulle fisieke behoeftes.

4. Soek My aangesig vir die kerk (5 min)

Skryf vyf dinge neer om vir die plaaslike kerk en die kerk in die algemeen te bid:

1. _____

2. _____

3. _____

4. _____

5. _____

en/of

- Bid dat gemeentes herstel sal word as huise van gebed vir die nasies (Jes.56:7; Matt.21:13);
- Bid dat gemeentes die Groot Opdrag sal uitvoer (Matt.28:18-20);
- Bid dat gemeentes die Groot Gebod sal uitleef (Matt.22:37-40);
- Bid vir 'n geestelike herlewing in die kerk (Ef.3:17-23);
- Bid vir die kerk om getrou te wees aan die Woord, en om die behoeftes van mense op 'n relevante wyse aan te spreek.(2Tim.3:1-17)

5. Soek My aangesig vir persoonlike behoeftes (5 min)

1. _____

2. _____

3. _____

4. _____

5. _____

6. Soek My aangesig deur My Woord te bid (5 min)

Begin deur stelselmatig deur die Psalms te bid. Lees en bid elke keer deur 2-3 Psalms.

7. Soek My aangesig deur na My te luister en op My te wag (5 min)

Lees Jes.42:8-9, Dan.8 en Ps.25:4-5. Vra dat die Here nuwe dinge aan jou sal bekendmaak, dinge waarvan Hy wil hê jy bewus moet raak en op moet let. Vra dat Hy Sy wil en Sy planne/strategieë aan jou sal bekendmaak. Vra Hom na die dinge wat op Sy hart is waarvoor Hy wil hê dat jy moet bid. Skryf neer (hou dagboek) wat jy van Hom hoor.

8. Soek My aangesig deur te bid vir die verbreking van vestings en dat mense wat daarby betrokke is, hulle sonde sal bely (5 min)

- Onsedelikheid;
- Towery en afgodsdienste;
- Onreg - skadelike optredes en dade;
- Rassisme - rassehaat en etniese trots;
- Onheilige verbonde.

En/of

Soek My aangesig deur te bid vir deurbrake ten opsigte van die volgende sake wêreldwyd:

- Die MIV/VIGS pandemie.
- Die groeiende getal arm en behoeftige mense.
- Korrupsie op alle vlakke.
- Die vervolgte kerk in baie lande.
- Oorloë, bloedvergieting en etniese geweld - bid ook vir die miljoene vlugteling.
- Kinders in nood: mishandeling en uitbuiting van kinders.

9. Soek My aangesig vir die nasies (5 min)

Skryf die name van vyf lande neer en bid vir hulle.

1. _____

2. _____

3. _____

4. _____

5. _____

- vir herlewing;
- vir die redding van onbereiktes en ongereddenes;
- vir volwasse en godvresende geestelike leiers;
- vir die vermenigvuldiging van toegewyde volgelinge;
- vir 'n sendingontwaking in plaaslike gemeentes.

En/of

- Bid dat die nasies sal ontdek dat Jesus die weg, die waarheid en die lewe is. (Joh.14:6).
- Bid dat die onbereikte mensegroepe op aarde deur die evangelie bereik sal word.(Luk.24:47-48)

- Bid dat die Here Sy vrede en heerlikheid oor lande en nasies sal uitstort. (Sag.9:10)
- Bid dat konings en regerings hulle sal onderwerp aan die heerskappy van Jesus as die Koning van die konings.(Jes.49:7)
- Bid dat die Here die nasies sal seën.(Jer.4:1-2)

10. Soek My aangesig vir My wil om te geskied op die aarde (5 min)

- Vir die openbaring van God se heerlikheid oor die hele aarde
- Vir die genesing van die nasies
- Vir versoening op alle vlakke (gesinne, kerke, etniese groepe of rasse, lande, ens.)
- Vir die verbreking van vestings, strukture en politieke stelsels wat die lewens van mense vernietig.
- Vra vir God se seën oor die nasies.

En/of

Soek My aangesig vir versoening van mense met God en met mekaar (5 min)

- Bid dat nasies sal bely as hulle hulle eie mense en ander nasies seergemaak, onderdruk of misbruik het.
- Bid vir versoening op alle vlakke (in gesinne, onderdrukking van vroue en kinders, tussen kerke en denominasies, etniese groepe of rasse, tussen state, ens.).
- Bid vir die verbreking van vestings, strukture en politieke stelsels wat die lewens van mense vernietig.
- Bid dat individue, gesinne en etniese groepe ander sal vergewe wat hulle geweld aangedoen het.
- Bid dat mense mekaar sal vergoed en vergewe.

11. Soek My aangesig deur te bid vir die jeug (5 min)

- Dat hierdie generasie jongmense hulle eie generasie sal bereik met die evangelie.
- Dat jongmense 'n nuwe intimiteit en gehoorsaamheid tot God sal bereik.
- Vir radikale, gehoorsame dissipels wat in heiligheid lewe.
- Om die Here radikaal te dien en Hom blindelings te volg.
- Vir medelydende harte, om selfs die armste en ellendigste mense te bereik en hulle te bedien.

12. Soek My aangesig met lofprysing en aanbidding (5 min)

Sluit jou gebedstyd af met lofprysing en aanbidding. Lees enige een van die Psalms 144-150. Dank die Here vir Sy goedheid. Seën mense wat in jou gedagtes opkom in die Naam van die Here Jesus Christus.

Model 2

'n praktiese gids oor hoe om vir een uur te bid

2.2 Die uur wat die wêreld verander

In sy boek *The hour that changes the world*, stel Dick Eastman voor dat jy 'n uur in 12 vyf minute periodes indeel. Na elke 5 minute beweeg jy aan na 'n ander vorm van gebed.

1. Lofprysing/Aanbidding is 'n daad van bewondering van en toewyding aan God. (5 min)

Ps.115:1 sê: *"Nie aan ons nie, Here, nie aan ons nie, maar aan u Naam kom die eer toe, want dit is U wat liefde en trou bewys."*

- Aanbid God vir wie Hy is: die een wat jou geskep het - vir Sy onfeilbare Woord - vir jou verlossing - dat jy in Sy plan ingesluit is...
- Dit is om God te verhoog en te vereer.
- Dit is om God te erken vir wie Hy is, om Hom met ons woorde, ons hele wese en ons gebedshouding groot te maak.
- Loof Hom vir Sy Naam, Sy geregtigheid, liefde, heiligheid, almag, grootheid, trou, alomteenwoordigheid, Sy Woord, Sy skepping, Sy verlossingsdade ens. Jy kan bv. elke keer 'n ander tema kies om in hierdie tyd van lofprysing en aanbidding te gebruik. Brei soveel moontlik op hierdie tema uit, oordink dit, oorweeg wat die praktiese implikasies daarvan vir jou en ander se lewens is.

2. Wag op die Here is 'n daad van oorgawe aan en liefde vir God en bewondering van God (dikwels woordelose aanbidding). (5 min)

Ps.46:11: *"Bedaar en erken dat Ek God is."*

- Dit is waar ek stil word voor God.
- Waar ek geestelik die deur toemaak vir enige invloed van die wêreld.
- Waar ek deur 'n daad van geloof in Sy teenwoordigheid kom staan.
- Dit is om God te aanbid en te prys vir wie Hy is.
- In hierdie tyd van stilte stel ons ons in op God self, rig ons ons wese op Hom en wy ons ons opnuut aan Hom toe. Ons verbly ons in Sy teenwoordigheid en oor Sy teenwoordigheid.
- Dit is 'n tyd van diep persoonlike en intieme kommunikasie met God, dit is wanneer ek as beperkte en eindige wese in die teenwoordigheid van God as die Onbeperkte en Oneindige Wese kom staan.
- By hierdie punt maak ons seker dat ons lewende kontak met God maak. Hierdie tyd van wag op die Here kan nie afgejaag word nie, daar is nie plek vir ongeduld en haastigheid nie.

- In hierdie periode dink jy aan niks anders as aan God die Vader, Sy Seun Jesus, jou Verlosser en die Heilige Gees nie.
- Gedagtes wat by jou opkom, hoef jy nie noodwendig om te sit in woorde nie. Konsentreer op jou verhouding met God en jou liefde vir Hom.

3. Sondebelydenis/verootmoediging is 'n daad van belydenis en reiniging van myself as God se tempel sodat ek vrye toegang tot God kan hê. (5 min)

“Die arm van die Here is nie te kort om te help nie en Sy oor is nie te doof om te hoor nie. Dit is julle oortredinge wat skeiding gebring het tussen julle en julle God, dit is julle sondes wat maak dat Hy Hom nie aan julle steur nie en nie na julle wil luister nie.” (Jes.59:1-2) “Maar as ons ons sondes bely, Hy is getrou en regverdig, Hy vergewe ons ons sondes en reinig ons van alle ongeregtigheid.” (1 Joh.1:9)

- Dit is die plek waar ek sonde op sy naam noem, my skuld bely, erken dat dit verkeerd is en daarvan wegdraai - en God se vergifnis aanvaar.
- Waar ek God vra om met elke vorm van hoogmoed en liefdeloosheid te deel.
- Dit is 'n tyd van selfondersoek en om die Heilige Gees toe te laat om enige onbelyde sonde aan jou uit te wys. Verlossing en vergifnis van ons sonde verkry ons slegs deur die bloed van die Here Jesus en op grond van Sy soendood aan die kruis.
- In sondebelydenis vra ek nie dat God noodwendig omstandighede moet verander nie, maar dat Hy my sal vergewe en my sal verander.

4. Bid die Skrif is om myself geestelik te voed en volgens God se agenda en openbaring te bid. (5 min)

- Dit is Woord-verrykte gebed - die Woord is jou handleiding om te bid.
- Dit is om volgens God se beloftes te bid. God se beloftes in die Woord wek geloof in ons harte.
- Die Bybel is in die eerste plek 'n boek wat geglo en gehoorsaam moet word. In hierdie periode vra ek: "Here, watter beloftes kan ek vir my toe-eien, watter bevels moet ek gehoorsaam, op watter waarskuwings moet ek ag slaan?"
- Ons moet die Here dag en nag aan die beloftes in Sy Woord herinner. Soos wat jy die Bybel lees, moet jy vir die Here vra hoe om dit toe te pas in jou lewe en in jou gebedstyd.

5. Waak is 'n tyd van geestelike waarneming, om geestelik te waak, om geestelik bedag te wees op sake waarvoor daar gebid moet word. (5 min)

“Volhard in die gebed! Wees daarby waaksaam en dankbaar” (Kol.4:2)

- Om te waak en om bewus te wees van die moontlikheid van aanvalle van die Satan. Bid en vra die Heilige Gees om jou te wys op die planne (drogredenاسies), metodes, vestings en strategieë van die Bose.

- Om bedag te wees op enige leiding van die Here.
- Om bedag te wees op enige openbaring van God.
- Vra vir insig, onderskeiding, wysheid en om te verstaan waarop jy moet fokus en wat jou prioriteite moet wees.
- Om te verstaan wat die wil van God is, waar Hy jou vandag wil gebruik.
- Om vir die Here te vra wat op Sy hart en op Sy agenda is.
- Is daar dinge wat in die koerante staan, wat ons oor die radio hoor of op die TV sien waarvoor ons moet bid; dinge soos ekonomiese probleme, politieke onrus en oorloë, waarvoor God wil hê jy moet bid?

6. Voorbidding/Intersessie is om vir ander mense in te tree, om te konsentreer op die nood en behoeftes van ander mense, om vir ander in die bres te staan. (5 min)

“Ek dring daarop aan dat daar in die eerste plek met smeking, voorbidding en danksegging gebid moet word vir alle mense, vir dié wat regeer en vir almal wat gesag uitoefen, sodat ons 'n rustige en stil lewe kan lei in volkome toewyding aan God en in alle eerbaarheid.” (1Tim.2:1-2)

- Om te bid vir God se plan in ander se lewens.
- Om tussen God en ander mense te gaan staan en vir hulle behoeftes te bid - te vra vir genade en barmhartigheid.
- Dit is 'n geestelike posisie voor God - om daar te bly staan totdat jy die versekering het dat God jou gehoor het en Hy jou vrystel om nie meer daarvoor te bid nie.
- Dit is God se metode om Sy kinders te betrek in Sy plan met die wêreld.
- Wanneer jy voorbidding doen, staan jy aan God se kant en werk jy saam met Hom tot redding of voordeel van iemand anders.
- Daar kan tye van "geestelike oorlogvoering" in ons gebedstyd wees. Bid en vra die Here om deur die werking van die Heilige Gees aan jou te toon waar magte van die Bose aan die werk is. Vanuit jou outoriteit in Christus moet jy die magte van Satan in Jesus se Naam bind, hulle vestings verbreek en drogredenasies vernietig. Weerstaan die duiwel en gee aan hom geen vashouplek nie. Jesus het die Bose aan die kruis oorwin. Ons as gelowiges, moet hierdie oorwinning op elke terrein van die lewe gaan proklameer.

7. Versoeke vir jou persoonlike behoeftes. (5 min)

“Gee ons vandag ons daaglikse brood” (Matt.6:11) “Moet oor niks besorg wees nie, maar maak in alles julle begeertes deur gebed en smeking en met danksegging aan God bekend.” (Fil.4:6) Jabes het die God van Israel aangeroop met die woorde: “Stort U seën oor my uit, vergroot my grondgebied, neem my onder U beskerming en weerhou onheil van my sodat geen smart my tref nie.” (1 Kron.4:10)

- Om vir my "daaglikse brood" te bid.
- Om my eie nood, emosies, krisisse, behoeftes en begeertes na God toe te bring.
- Met nederigheid en in totale afhanklikheid kom vra ek God om in my behoeftes te voorsien.
- Ek kom as God se dienskneg en Sy kind.
- Moenie voorskrytelik wees nie.
- Kom met geloof en vertrouwe - as God se vriend.
- Wees spesifiek.
- Christene mag met vrymoedigheid hulle persoonlike behoeftes na die Vader toe bring en hulle kan met 'n verwagting bid, selfs oor die kleinste dingetjies.
- Waak teen selfsugtige begeertes.

8. Danksegging is 'n tyd waarin ek my waardering teenoor God uitspreek vir Sy sorg en beskerming en vir wie Hy is. (5 min)

"Wees in alle omstandighede dankbaar, want dit is wat God in Christus Jesus van julle verwag." (1Tess.5:18)

- Dink oor die dag en dank God vir Sy sorg vir jou en ander.
- Dank God vir nuwe dinge wat Hy gedoen het en doen: geestelik, fisies, sosiaal.
- Dank Hom oor wie Hy is, Sy gawes, antwoorde op gebed...al Sy seëninge.
- Wees spesifiek in jou danksegging.

9. Sang is melodieuze lofprysing/aanbidding. (5 min)

"Juig tot eer van die Here, almal op aarde! Dien die Here met blydschap! Kom voor Hom met gejubel! Erken dat die Here God is: Hy het ons gemaak en ons is Syne, ons is Sy volk, Sy eie kudde. Gaan Sy poorte binne met dankliedere, Sy tempel met lofsange, dank Hom, prys Sy Naam, want die Here is goed, aan Sy liefde is daar geen einde nie, Sy trou duur van geslag tot geslag." (Ps.100)

- Dit is 'n aksie om God met geestelike liedere te aanbid en te prys.
- Dit kan 'n "battle cry" teen die magte van die duisternis wees. Sang en geestelike oorlogvoering (ons stryd teen die Bose) is onlosmaaklik deel van mekaar.
- Gebruik bekende liedere of sing jou eie nuwe liedere. Jy kan begin deur Skrifgedeeltes te neem en daarvan liedere te maak.
- Dit is om die Vader deur sang te verheerlik, te bewonder en te aanbid.

10. Oordenking (meditasie) is om 'n saak dieper te oordink of te ondersoek, om dit geestelik te evalueer. (5 min)

"Dit gaan goed met die mens...wat in die woord van die Here sy vreugde vind, dit dag en nag oordink." (Ps.1:1-2) "Hierdie wetboek moet die rigsgoer wees vir alles wat jy sê. Oordink dit dag en nag en sorg dat jy alles uitvoer wat daarin geskryf staan. Dan sal jy slaag in wat jy moet doen, jy sal voorspoedig wees." (Jos.1:8)

- Mediteer (oordink) oor die wese en die natuur van die Drie-Enige God, Sy skepping, Sy dae (werke) en karakter.
- Neem 'n spesifieke tema uit die Skrif en dink daaroor (geregtigheid, liefde, waarheid, lig, vrede, heiligheid, ens.).
- Neem 'n Skrifgedeelte en oordink dit (mediteer).
- Maak God self die hoofokus van jou meditasie/oordenking: Sy werke of dae, Sy Woord, Sy karakter.

Christelike oordenking (meditasie) staan teenoor Oosterse meditasie. In Oosterse meditasie gaan dit hoofsaaklik oor 'n passiewe gemoedstoestand en om jou verstand "leeg" te maak. Vir die Christen is oordenking 'n aktiewe proses van evaluering, ondersoek en bepeinsing waarby jy met jou volle verstand betrokke is en waar jy jou deur die Skrif en die Heilige Gees laat lei. Oordenking is om gedissiplineerd na te dink. Waak dat die Satan nie sy gedagtes in jou plant nie. Waak ook teen negatiewe gedagtes in hierdie periode. Bedink alles wat waar, rein, edel, reg, mooi en prysenswaardig is. Wanneer jy 'n betrokke gedeelte uit die Skrif oordink, moet jy onder andere vir jouself vra wat hierdie gedeelte vir j^{ou} wil sê.

11. Luister is 'n periode waarin jy opdragte van God ontvang, waar jy Hom vra om vir jou dinge te wys wat Hy wil hê dat jy sal raaksien en aan aandag moet gee. (5 min)

“Moenie te gou praat nie, moenie oorhaastig 'n belofte aan God maak nie, want Hy is in die hemel en jy op die aarde. Laat jou woorde daarom min wees.” (Pred.5:2)

- Dit is om na die innerlike stem van die Heilige Gees te luister.
- Waar jy vra: Wat is daar wat U wil hê ek moet doen? Wat is U wil vir vandag?
- Om leiding uit die Woord te soek.
- Om God doelbewus te vra om Sy wil en strategieë/planne aan jou bekend te maak.
- In wag op die Here gaan dit om God lief te hê. Tydens oordenking wil ons meer van God leer. In die periode van luister wil ons hoor wat God vir ons wil sê. In hierdie periode vra ek: "Here, wat verwag U van my, wat is U wil vir my?"
- Jy kan ook vir die Here spesifieke vrae vra, miskien moeilike vrae waarop jy nie antwoorde het nie. Wees sensitief vir die Heilige Gees.
- Wees versigtig om sommer vinnig te sê: "Die Here het dit en dat vir my gesê".

12. Lofprysing is om God groot te maak, te verheerlik, aan Hom te sê dat jy weet tot Wie jy gebid het en dat jy Hom vertrou met jou gebede. (5 min)

“Aan U behoort die koninkryk en die krag en die heerlikheid tot in ewigheid. Amen.” (Matt.6:13)

- Maak jou amen aan die einde sterk en bevestig daarmee dat jy glo dat God jou gehoor het en sal verhoor. Amen beteken: dit is waar en seker, dit sal so wees.
- Dit is 'n finale geestelike daad om God op die troon van jou lewe te plaas.
- Dit is waar jy bely: Aan U behoort die koninkryk en die krag en die heerlikheid tot in alle ewigheid. Amen.

3 31 Woordgebede

3.1 Seën ons gemeenskap

Vader, in die Naam van die Here Jesus Christus vra ons dat U ons gemeenskap sal seën. Dat U ons sal seën en beskerm; dat U tot ons redding sal verskyn en ons genadig sal wees; dat U ons gebede sal verhoor en aan ons vrede sal gee! (Num.6:24-25). Ons bid dit vir ons bure, ons kollegas by die werk, vir die polisie en die mense in tronke, vir die kinders in die skool, die dokters, verpleegsters en pasiënte in hospitale, vir die vaders en moeders in ons gemeenskap en vir die besighede, die onderwysers in skole, die stadsraad en regeringsamptenare, die haweloses, die werkloses, die wat betrokke is by allerlei vorme van verslawing, die behoeftiges, die president van ons land en sy adviseurs, die ministers in die regering en al hulle personeel.

Aan U, die Vader van ons Here Jesus Christus, kom al die lof toe! U het ons in Christus geseën met al die seëninge van die Gees wat daar in die hemel is (Ef.1:3). Soos wat Jabes uitgeroep het tot die God van Israel, roep ons U aan vir ons gemeenskap. "Stort u seën oor ons uit, vergroot ons grondgebied, neem ons onder U beskerming en weerhou onheil van ons sodat geen smart ons tref nie" (1Kron.4:10).

God, wat vrede gee, sal U ons volkome aan U toegewyd maak en ons geheel en al, na gees, siel en liggaam, so bewaar dat ons onberispelik sal wees wanneer ons Here Jesus Christus weer kom (1Tess.5:23-24). Aan U wat magtig is om ons van struikeling te bewaar en ons onbevlek en met vreugde U heerlijkheid te laat aanskou, aan U, die enigste God, ons Verlosser deur Jesus Christus ons Here, aan U behoort die heerlijkheid en die majesteit, die krag en die mag, van alle ewigheid af, ook nou en tot in alle ewigheid! Amen.

Here Jesus, mag U genadig oor ons gemeenskap wees! (1 Kor.16:23).

3.2 Ons verhoog U Naam

Ons Hemelse Vader, U is hoog en verhewe en leef in ewigheid. U Naam is Heilig (Jes.57:15). Laat U Naam in ons gemeenskap geheilig word (Matt.6:9). U het ons beveel om nie U Naam in oneer te misbruik of om 'n vals eed in U Naam af te lê nie (Eks.20:7; Lev.19:12; 24:16). Tog is U Naam oneer aangedoen onder die nasies deurdat ons U nie aangeroop het nie, maar vreemde gode om hulp gevra het (Eseg.36:23; Ps.44:21). Ons bely dat ons ongehoorsaam was aan U bevel. Wanneer ons nou bid en U Naam bely, en wegdraai van ons verkeerde weë, luister tog uit die hemel, en herstel ons land (2 Kron.7:14). Vergewe ons asseblief en heilig U Naam sodat al die nasies, selfs U vyande, sal besef dat U die Here is en ontsag vir U sal hê (Eseg.36:21,23; Jes.64:2; Ps.102:16).

Behalwe U, Here ons God, het ander meesters oor ons en ons gemeenskap regeer, maar ons wil net U Naam onthou (Jes.26:13). Die begeerte van ons harte is om U Naam in ons gemeenskap te eer en U aan te roep (Jes.26:8). Selfs in die nag wil ons aan U dink en U waardeer (Ps.119:55; Mal.3:16). Leer ons U pad Here, ons wil wegbreek van die ongeregtigheid en wandel in U waarheid; leer ons om U met toewyding te dien (Ps.86:11; 2Tim.2:19; Openb.2:13; 3:8). U Naam is wonderlik, soos suiwer parfuim en 'n sterk vesting waar ons skuiling vind (Rigt.13:18; Hoogl.1:3; Spr.18:10; Ps.61:4).

3.3 God se genade en barmhartigheid

Barmhartige Vader, hoor tog die gebed van U dienaars, hoor ons smee om barmhartigheid (1Kon.8:28). Soos die oë van 'n slaaf gerig is op die hand van sy eienaar, soos die oë van 'n slavin gerig is op die hand van haar eienares, so is ons oë op U gerig, Here ons God, totdat U U oor ons ontferm (Ps.123:2). Ons kom met vrymoedigheid na die genadetroon, sodat ons barmhartigheid en genade kan ontvang en so op die regte tyd gered kan word (Heb.4:16; Ps.5:8; 6:9; 28:2). Moet tog nie U ontferming van ons weerhou nie, Here. Laat U liefde en trou ons voortdurend bewaak (Ps.40:12). So groot as die afstand tussen hemel en aarde is, so groot is U liefde vir dië wat U dien. U is goed; U liefde vir die wat U dien, is onverganklik en U trou vir opeenvolgende geslagte (Ps.103:11,17; 106:1; Luk.1:50).

U is die barmhartige en genadige God, lankmoedig, vol liefde en trou. U betoon U liefde aan duisende geslagte. U vergewe ongeregtigheid, oortreding en sonde, maar U spreek niemand sonder meer vry nie. U reken kinders en kleinkinders die sondes van die vaders toe selfs tot in die derde en vierde geslag. U is vir almal goed en barmhartig oor alles wat U geskape het (Eks.34:6-7; Ps.145:9). Deur U liefde vergaan ons nie en daar is geen einde aan U ontferming nie. As U beproewing oor 'n mens gebring het, ontferm U U weer, want U liefde is groot (Klaagl.3:22,32). U, as soewereine God, verklaar: "Ek betoon genade aan wie Ek genade wil betoon en Ek ontferm My oor wie Ek My wil ontferm." (Eks.33:19; Rom.9:16,18). Moet ons tog nie uitsluit van U ontferming nie, Here, laat U liefde en trou ons voortdurend bewaak (Ps.40:12).

3.4 Ons aanbid U

Aan U alleen behoort die heerlikheid tot in ewigheid! (Rom.11:36). Aan U wat vir ewig Koning is, die onverganklike, onsienlike, enigste God, kom toe die eer en die heerlikheid tot in alle ewigheid! (1Tim.1:17). Ons eer U ons God, die goeie en enigste Heerser, die Koning van die konings en die Here van die heersers. U alleen besit onsterflikheid, U woon in ontoeganklike lig. Geen mens het U gesien of kan U sien nie. Aan U kom toe eer en ewige mag! (1Tim.6:15-16).

Here, ons verklaar dat U in die begin die aarde gevestig het, die hemele is ook die werk van U hande. Die dinge sal vergaan, maar U bly bestaan; soos 'n kledingstuk sal alles verslyt; soos klere sal U dit oprol; ja, soos 'n kledingstuk sal dit vervang word. Maar U, U bly dieselfde, en U jare het geen einde nie (Heb.1:10-12).

Here Jesus, U is die eerste wat uit die dood opgestaan het, die heerser oor die konings van die aarde. Uit liefde vir ons het U ons deur U bloed van ons sondes verlos en ons U koninkryk gemaak, priesters vir God ons Vader. U is die Alfa en die Omega, U wat is en wat was en wat kom, die Almagtige (Openb.1:5-8). Here, ons God, U is waardig om die heerlijkheid en die eer en die mag te ontvang omdat U alles geskep het; deur U wil het alles ontstaan en is dit geskep (Openb.4:11). Die Lam wat geslag was, is waardig om die mag en rykdom, die wysheid en sterkte, die eer, heerlijkheid en lof te ontvang (Openb.5:12). Groot en wonderbaarlik is U daad, Here God, Almagtige. Reg en betroubaar is u optrede, Koning van die nasies. Wie sal U nie vrees nie, Here, en U Naam nie verheerlik nie? U alleen is heilig! Al die nasies sal kom en U aanbid, want hulle sal sien dat U handelwyse regverdig is (Openb.15:3-4).

3.5 Vir U genade en barmhartigheid

Wees ons genadig, O God, maak ons gemeenskap tog gesond deur U troue liefde en wis ons oortredings uit in U groot barmhartigheid (Ps.41:5; 51:3). As ons ons sonde wegsteek, kan ons niks goeds te wagte wees nie; daarom wil ons ons sonde bely en daarvan afsien, sodat ons genade kan ontvang (Spr 28:13). Moet tog nie die ongeregthede van vorige geslagte op ons laat neerkom nie, ontferm U tog gou oor ons, want ons kragte is gedaan (Ps.79:8).

Wie is 'n God soos U? U vergewe sonde en straf nie die sonde van die wat uit U volk oorgebly het nie, U bly nie vir altyd kwaad nie, maar U betoon liefde en genade (Miga 7:18). Wees die mense in ons gemeenskap genadig, net soos U teenoor Israel genadig was. In U groot ontferming het U hulle nie heeltemal uitgewis nie en hulle nie verlaat nie. Laat diegene wat nie voorheen in U ontferming gedeel het nie, nou U barmhartigheid ontvang sodat hulle U kan eer (Neh.9:31; 1Pet.2:10; Rom.15:9).

U het aan ons bekend gemaak wat goed is: U vra van ons dat ons reg sal laat geskied, dat ons genade en trou sal bewys, en dat ons bedagsaam sal lewe voor ons God (Mig.6:8). Help ons om volgens U wil te lewe; help ons om U voorbeeld na te volg deur reg te laat geskied aan almal, en liefde en barmhartigheid te bewys aan mekaar. "Geseënd is die wat barmhartig is, want aan hulle sal barmhartigheid bewys word." (Sag.7:9; Matt.5:7; Rom.12:18). Help ons dat ons nie geregtigheid, barmhartigheid en betroubaarheid nalaat nie (Matt.23:23). Saam met die kerk van al die eeue roep ons tot U: "Here Jesus Christus, Seun van die Lewende God, ontferm U tog oor ons!" (Matt.9:27; Luk.18:38; Matt.15:22). Mag barmhartigheid, vrede en liefde in oorvloed aan ons geskenk word! (Judas 2).

3.6 Vir die genesing van ons land

U het die mens geskep as U verteenwoordigers op aarde, man en vrou het U hulle geskep om die aarde te bewoon en te heers oor die visse in die see, oor die voëls in die lug, oor al die diere van die aarde (Gen.1:26-27). U het aan al die mense op aarde die asem gegee en lewe aan alles wat op die aarde beweeg (Jes.42:5; Gen.2:7). U het aan die mens kos voorsien – al die plante wat saad gee op die hele aarde, ook al die bome wat vrugte dra en saad gee. Alles wat roer en lewe, is as kos aan ons gegee. (Gen.1:29; 9:3; Deut.12:15). Dit is U, Here God wat die aarde vrugbaar maak, U laat gras uitspruit vir die diere, en groen plante vir die mens sodat hy sy kos uit die aarde kan kry: wyn om mense se harte bly te maak, olie om die gesig te versorg en kos om die mens nuwe krag te gee (Gen.1:11; 27; 28; Ps.104:14,15). U, Here God, gee vir die land sy reën op die regte tyd lente- en somerreëns (Ps.65:10,11; 147:8; Deut.11:14).

U heers oor die hele aarde (Ps.97:1), maar U het die aarde aan die mense as woonplek gegee en om oor te heers (Ps.115:16). U is bewus van alles wat op aarde gebeur (Sag.4:10; Ps.33:13). U hou slegte en goeie mense dop (Spr.15:3). Daar is niks in die skepping wat vir U onsigbaar is nie; alles lê oop en bloot voor U oë, en ons moet aan U rekenskap gee (Heb.4:13). Hier waar ons nou voor U staan, bely ons dat ons, die mense van hierdie gemeenskap, U gefaal het in ons opdrag wat ons van U ontvang het. Ons land is verontreinig deur ons ongehoorsaamheid aan U en omdat ons U voorskrifte geminag het en U verbond verbreek het (Gen.6:11-12; Jes.24:4-6). Wees ons asseblief genadig wanneer ons as kinders van God na U terugdraai en pleit om vergifnis (Rom.4:7) en vir die genesing van ons gemeenskap en ons land (2Kron.7:13-15).

3.7 Belydenis vir bloedvergieting

Here God, U is die barmhartige en genadige God, lankmoedig, vol liefde en trou. U vergewe ongeregtigheid, oortreding en sonde (Eks.34:6,7).

Wees ons genadig, want selfs die uithoeke van die land is verontreinig, korrup en vol geweld (Ps.74:20; Gen.6:11,12). Die aarde laat dorings en dissels uitspruit en spoeg sy bewoners uit (Gen.3:17,18; Lev.18:25). Ons land is vol bloedvergieting, ons dorpe en stede vol van geweld en ongeregtighede. Ons en die vorige geslagte het weinig respek vir lewe getoon (Eseg.13:19; Hab.1:17). As gevolg van bloedvergieting - moorde, oorloë en aborsies, het menige mense doellose swerwers op aarde geword (Gen.4:11,12). Die grond is vervloek en lewer nie sy opbrengs wanneer dit bewerk word nie. Die hemel het brons geword en die aarde onder ons, yster (Gen.4:12; Deut. 28:23; Ps.107:34). U haat hande wat met bloed bevlek is en U sal U oë vir ons toemaak wanneer ons bloedbevlekte hande in gebed na U uitstrek (Spr.6:17; Jes.1:15; 59:2). U leer ons dat die lewe van 'n persoon in sy bloed is en dat hulle bloed van die aarde af na U roep om wraak (Gen.4:10).

Here, ons Verlosser, vergewe ons asseblief vir al die bloedvergieting in ons land en in hierdie gemeenskap; verwyder die vloek van bloedvergieting van die grond, was ons skoon van ons skuld en reinig ons van ons sonde (Joel 3:21; Ps.51:3,14). Dis U wat die oorloë op aarde laat ophou wanneer U tussen baie volke oordeel en regspraak oor sterk nasies (Ps.46:10; Miga 4:3). Wees ons genadig en vestig U koninkryk in ons gemeenskap en ons land, hou dit in stand deur reg en geregtigheid, van nou af en vir altyd (Jes.9:6,7; Sag.9:10; Rom.14:17).

3.8 Belydenis vir afgodery

Here, Almagtige, God van Israel, U wat oor die gerubs troon, U alleen is God oor al die koninkryke van die aarde, U het die hemel en die aarde gemaak (Jes.37:16). Daar is buiten U geen God nie; net U is 'n God wat regverdig is en red (Jes.45:21). Van die skepping van die wêreld af kan 'n mens uit U werke duidelik aflei dat U krag ewigdurend is en dat U waarlik God is. Daar is dus geen verontskuldiging vir die mens nie omdat, al weet ons van U, het ons U nie as God geëer en gedank nie. Met ons redenasies bereik ons niks en deur ons gebrek aan insig, bly ons in die duister. Ons, en vorige geslagte, het die waarheid van God verruil vir die leuen. Ons dien en vereer die skepsel in plaas van die Skepper (Rom.1:20,25). Ons het vreemde gode om hulp gevra (Ps.44:21). Deur ons afgodery, onsedelikheid en selfverering het ons die land verontreinig (Kol.3:5; Ps.106:38; Eseg.22:4; 36:18). U het ons beveel om vir ons geen gode te maak nie. Geen beelde of klip-pilare op te rig, geen klippe met afbeeldings te hê wat deur ons vereer word nie. U, die Here, is ons God (Lev.26:1).

Ons pluk nou die vrugte van ons sondigheid. Droogte teister ons, hongersnood roei mens en dier uit, oorloë woed tussen nasies en natuurrampe verwoes ons land omdat ons troueloos teenoor U was en van U weggedraai het asof U gefaal het! (Eseg.14:12-21; Jer.2:5). Here, ons is te skaam en het nie die vrymoedigheid om ons koppe voor U op te tel nie. Ons sonde is hoog opgestapel, ons misdade staan hemelhoog (Esra 9:6,7). Ons het gesondig, net soos ons voorvaders, het ons verkeerd gedoen en is skuldig. Wees ons genadig en vergeef ons asseblief ons sondes (Ps.106:6). Gooi reinigingswater oor ons uit sodat ons rein kan word van ons onreinheid en afgodery (Eseg.36:25,26). Sorg asseblief dat ons die name van afgode nie weer noem nie en dat ons hulle nooit weer aanroep nie. Rig U kerk op wat rein en vlekkeloos is en wat die ryke verskeidenheid van U wysheid aan elke mag en gesag in die hemelruim bekend kan maak (Hos.2:17; Ef.3:10).

3.9 Belydenis vir onreg en gebroke verbonde

Almagtige God en Vader van ons Here Jesus Christus, ons prys U vir U grootheid. U is die Rots, U werk is volmaak, alles wat U doen, is regverdig. U is die getroue God, sonder onreg; U is regverdig en betroubaar (Deut.32:3,4). U troon is gebou op geregtigheid en reg, barmhartigheid en trou staan in U diens (Ps.89:15). U laat reg geskied aan die weeskind en die weduwee. U het die vreemdeling lief en gee vir hom kos en klere (Deut.10:18). Die hele wêreld is vol van U troue liefde, O God (Ps.33:5).

U het aan ons bekend gemaak wat goed is: U vra dat ons reg sal laat geskied, dat ons liefde en trou sal bewys en dat ons bedagsaam sal lewe voor ons God (Miga 6:8).

Regter van die hele aarde, ons smeeek om genade en barmhartigheid vir ons gemeenskap en ons land. Daar is geen sprake van reg en geregtigheid vir ons nie. Ons struikel en val as gevolg van ons oortredings en ons sondes kla ons aan. Ons oortredings bly ons by, ons bly bewus van ons sondes: die oortreding en die geveinsheid teenoor U, Here. Ons beplan onderdrukking en verdraai die reg. Reg het van die toneel verdwyn, geregtigheid is ver van ons af. Die waarheid struikel waar reg nie gespreek word nie. (Jes.59:9-15). Die land is in rou, dit is besoedel deur sy inwoners omdat ons die wette oortree en nie ons verbond met U gehou het nie. Daarom word ons land deur 'n vloek verteer (Jes.24:3-6). Ons bou huise met onreg en laat mense werk sonder betaling (Jer.22:13). Baie van ons stede is aangelê op onreg (Hab.2:12). Ons verdraai die reg van die armes, ontsê die armes hulle reg, buit weduwees uit en plunder weeskinders (Jes.1:17). Ons bely ons sondes en vra om vergifnis, ons draai terug na U toe. Vul ons harte met waarheid en geregtigheid en genees ons land. (2Kron.7:14) Ons vra dit in die Naam van Jesus.

3.10 Belydenis vir onsedelikheid

Here God, ons het die land verontreinig deur egskeidings, met afskuwelike seksuele praktyke soos homoseksualiteit, bloedskanie, seksuele losbandigheid en prostitusie (Jer.3:1-3; Rom.1:26,27; Lev.18:23). Ons bely dat ons geslag gevul is met alle ongeregtighede, seksuele onsedelikheid, boosheid, ontrouheid, gierigheid, selfsug, moord, hoogmoed, valsheid en bose gedagtes. Mense is vol boosheid, hebsug, gemeenheid; vol jaloesie, moord, twis, bedrog en kwaadwilligheid. Hulle skinder en praat kwaad; hulle haat God, hulle is hooghartig, aanmatigend, verwaand. Mense dink kwaad uit en is ongehoorsaam aan hulle ouers, onverstandig, onbetroubaar, liefdeloos en hardvogtig (Rom.1:29,20). Ons bely dat ons, selfs in die kerk ons liggame besmet met onsedelikheid en so die tempel van die Heilige Gees beskadig (1Kor.6:18-20). Ons erken en bely dat ons skuldig staan voor U.

As U ons sondes in aanmerking sou neem, Here, wie sou dan nog bestaan? Maar by U is daar vergifnis: daarom word U steeds gedien (Ps.130:3,4). Ja U, Here ons God, bewys barmhartigheid en U vergewe, al was ons opstandig teen U (Dan.9:9). Ons staan in nederigheid voor U en vra dat U ons sal lei in die waarheid en ons U pad sal leer (Ps.25:9). Help ons dat ons nie deur ons sondige natuur beheer sal word nie, maar dat ons 'n einde sal maak aan ons sondige begeertes met die hulp van die Heilige Gees (Rom.8:13). Ons begeer dat ons lewe deur die Gees van God beheer sal word en dat ons nooit sal swig voor die begeertes van die sondige natuur nie. Laat die vrug van die Gees sigbaar word in die Kerk: liefde, vreugde, vrede, geduld, vriendelikheid, goedhartigheid, getrouheid, nederigheid en selfbeheersing (Gal.5:16-

26). Help ons dat ons ons altyd goed sal gedra onder die heidene sodat hulle ons voorbeeldige lewe kan sien en U sal verheerlik (1Pet.2:12). Vergewe ons dat ons gefokus is op die behoeftes van die vlees. Help ons om ons gedagtes te fokus op die Gees om U sodoende te behaag (Rom. 8:5-8). Ons smeek U, verander ons deur ons gedagtes te vernuwe deur U Woord, sodat ons nie aan hierdie sondige wêreld gelyk word nie, maar dat ons kan onderskei wat die wil van God is, wat vir U goed en aanneemlik en volmaak is (Rom.12:2).

3.11 Stort U Gees oor ons uit

Vader van ons Here Jesus Christus, dankie dat ons kan leef in die bedeling en tyd van die Heilige Gees, wat ons alles leer en herinner aan wat U gesê het en om ons te vertrou (Joh.14:26). Dankie dat ons aangeneem is as kinders deur die Heilige Gees, en dus vir U kan ken en U aanroep as “Abba Vader” (Rom.8:15; Gal.4:6; Ef.1:17). U het ons nie alleen agtergelaat nie, maar aan ons die Helper gegee (Joh.14:16,18; Joh.15:26).

Vergewe ons vir die menige kere waar ons die Heilige Gees van God bedroef of geïgnoreer het, geweier het om aan Hom onderdanig te wees en Hom weerstaan het (Ef.4:30; 1Tess.5:19; Hand.5:9). Bewaar ons om nooit teen die Heilige Gees te spreek, of te rebelleer of te lieg nie, sodat Hy teen ons draai en ons vyand word nie (Matt.12:32; Hand.5:3; Jes.63:10,11). Gee ons asseblief U Gees wat wysheid en insig, raad en sterkte gee en wat kennis verleen en eerbied vir die Here (Jes.11:2), sodat ons die wysheid en vrymoedigheid sal hê om U Woord te verkondig aan alle mense, selfs aan diegene in gesagsposisies (Dan.4:9; 5:11; Hand.4:18-19). Bekragtig ons met U Gees, sodat selfs al sou ons vervolgd word, ons nogtans U Waarheid sal uitdra en nie sal swyg oor U liefde en die hoop wat ons in ons harte het nie (Hand.4:31). Stort U liefde in ons harte uit deur die Heilige Gees, sodat ons onvoorwaardelik kan liefhê (Rom.5:5). Die Gees wat U ons gegee het, maak ons immers nie lafhartig nie, maar vul ons met krag en liefde en selfbeheersing (2Tim.1:7). Laat die vrug van die Heilige Gees sigbaar wees in en deur ons lewens (Gal 5:22-23). Kom, Heilige Gees, oortuig die wêreld van sonde, van ongeregtigheid en van oordeel (Joh.16:7-8). Laat die Kerk vermenigvuldig en leef in gehoorsaamheid aan die Here deur die krag van die Heilige Gees (Hand.9:31). Bekragtig ons deur U Gees sodat ons U getuies kan wees tot aan die einde van die aarde (Hand.1:8).

3.12 Laat alle mense U Stem hoor

Ons Vader in die hemel, U stem weerklink oor die nasies, U stem is magtig, ja, die stem van die Here is vol majesteit. U stem kloof die seders van die Libanon oop. U stem laat weerlig uitlaan. U stem laat die woestyn bewe, U stem laat die wildsbokke ruk van skrik, dit stroop die bosse kaal. In U paleis (die hart van die kerk) roep almal uit: “HOE GEWELDIG!” (Ps.29:1-9)

Vader, U het gesê: “Laat daar lig wees!” en daar was.... lig (Gen.1:3). U het U Seun na ons donker wêreld gestuur en die Woord het mens geword (Joh.1:1-14) .. en daar was lig...! Dankie dat U U Seun gestuur het, sodat ons die lig kan sien en die hoop in ons harte kan brand (Ef.1:18). U stem het vanuit die hemel ons beveel om na U Seun te luister (Mark.9:7). Jesus het gesê dat Hy die Goeie Herder is, en dat al Sy skape Sy stem ken (Joh.10:3-5; 14-16). Help ons om die waarheid van die leuen te onderskei en om waarlik U stem te ken (Joh.18:37), en as ons U stem hoor, help ons om nie hardkoppig te wees en teen U in opstand te kom nie (Heb.3:7-15).

Ons bid dat ons gemeenskap en ons land U stem sal hoor, al raas en wankel koninryke (Ps.46:6-7). Openbaar U mag ook aan diegene wat U nie ken of U gehoorsaam nie, sodat hulle voor U kan buig (Eks.5:2). Gee die regte woorde in ons mond sodat U stem deur ons hoorbaar word en regerings en leiers dit gehoorsaam en daarvolgens lewe (Mark.3:11). Help ons om naby U te bly sodat ons die boodskappe kan ontvang wat U deur die kerk wil sê (Deut.5:25-27). Gee ons ook die vermoë om die Evangelie te verkondig en te vertaal in die verskillende tale van die mensdom (Hand.2:11). Help ons om so naby U te leef dat ons die begeertes van U hart sal hoor en onself beskikbaar stel in U diens (Jes.6:8).

3.13 Vir verhoudings in die kerk

Here Jesus Christus, U is die Hoof van die Liggaam, van die Kerk. Ons bely as Kerk dat ons nie U Liggaam korrek begryp het nie en dat ons meer van onself gedink het as wat ons behoort te dink. Ons het vergeet dat ons baie lede in een liggaam is, en die lede het nie almal dieselfde funksie nie, maar ons is almal afsonderlik lede van mekaar (Rom.12:3-5). Ons bely dat ons onself verhef het oor wat ons in eiewaam van onself gedink het, en nie aan die Hoof, Christus, vasgehou het nie. Die Liggaam het as gevolg hiervan gely, uit lid geraak en kon nie tot volwassenheid groei nie (Kol.2:18,19). Ons byt en verskeur mekaar en sommige lede is vernietig deur ons liefdeloosheid (Gal.5:14-15). Vergewe ons asseblief en herstel ons verhoudinge. U het die liggaam so saamgestel dat daar nie verdeeldheid in die liggaam sou wees nie, maar dat die lede gelyke sorg vir mekaar dra; dat ons saam sal ly, en saam bly sal wees as een van die lede eer ontvang (1Kor.12:24-27). Gee dat ons een sal wees net soos U en die Vader een is. Mag U gebed beantwoord word dat die Vader ons in U Naam sal bewaar, die Naam wat aan U gegee is, en dat ons eenheid sigbaar sal word in ons liefde vir mekaar (Joh.17:11), want as ons mekaar liefhet, sal almal weet dat ons U dissipels is (Joh.13:35).

Ons bid dat U ons, die Kerk sal herstel volgens die doel wat U vir ons bestem het nog voor U die mens geskape het (Ef.2:15; Ef.3:10.11). Wanneer ons mekaar aanvaar in eensgesindheid, word U Naam geloof (Rom.15:7).

3.14 Die bloed van Jesus Christus

Volgens die Skrif word alles met bloed gereinig, en sonder die vergieting van bloed vind daar geen vergifnis plaas nie (Heb.9:22). Ons kom na U Here Jesus, die Middelaar van die nuwe verbond (Heb.12:24). Dankie dat U U liefde vir ons juis hierin bewys het dat Christus vir ons gesterf het toe ons nog sondaars was (Rom.5:8). Ja, U het Hom gegee as offer, wat deur Sy bloed versoening bewerk het vir die wat glo. Christus het gekom as Hoëpriester en met Sy eie bloed het Hy die heiligdom binnegegaan en 'n ewige verlossing tot stand gebring (Rom.3:25; Heb.9:11-12). Met die kosbare bloed van Christus, die Lam wat vlekloos en sonder liggaamsgebrek is, is ons verlos en is ons oortredinge vergewe kragtens die ryke genade van God (1Pet.1:18-19; Ef.1:7; Kol.1:14). Deur U groot liefde het U ons wat dood was as gevolg van ons oortredings, saam met Christus lewend gemaak (Ef.2:5). Deur die bloed van U Seun aan die kruis het U die vrede herstel en is ons met Uself, ons Hemelse Vader, versoen (Kol.1:20).

Here Jesus Christus, deur U bloed is ons gewete bevry van die las van dae wat tot die dood lei, sodat ons die lewende God kan dien (Heb.9:14). Uit liefde vir ons het U ons deur U bloed van ons sondes verlos (Openb.1:5; 1Joh.1:7) en het U ons uitverkies en deur die Gees afgesonder en besprinkel met U bloed (1Pet.1:2). Deur U bloed het ons die oorwinning oor Satan behaal (Openb.12:11).

Nou vra ons, O God wat vrede gee, mag U ons toerus met alles wat goed is, sodat ons U wil kan doen. Mag U deur Jesus Christus in ons tot stand bring wat vir U aanneemlik is. Aan U behoort die heerlikheid tot in alle ewigheid! Amen (Heb.13:20-21).

3.15 Vir die kerk om God se doel te bereik

Here Jesus Christus, mag U deur U kerk geopenbaar word en deur die Skrif bekend gemaak word sodat nasies in U kan glo en aan U gehoorsaam kan wees (Rom.16:25-27). Vader, vestig die getuienis van Christus in die kerk. Ons bly vol verwagting uitsien na die verskyning van ons Here Jesus Christus. Gee dat ons nie aan een genadegawe sal ontbreek nie, sodat ons ons taak kan uitvoer en dat ons tot aan die einde vas sal staan sodat daar geen aanklag teen ons sal wees op die dag wanneer ons Here Jesus Christus kom nie (1Kor.1:4-8).

Vader, met danksegging en smeking bid ek dat liefde en geloof in die kerk sal toeneem. Sal U, die God van ons Here Jesus Christus, die Vader aan wie die heerlikheid behoort, deur U Gees aan ons wysheid gee en U so aan ons openbaar dat ons U werklik kan ken en U bekend maak aan die mense in ons gemeenskap. Ek bid dat U ons geestesoë so verhelder dat ons kan weet watter hoop U roeping inhou, en watter rykdom daar is in die heerlike erfenis wat U vir die gelowiges bestem het, en hoe geweldig groot die krag is wat U uitoefen in ons wat glo. Dit is dieselfde kragtige werking van U mag wat U uitgeoefen het toe U Christus uit die dood

opgewek en Hom in die hemel aan U regterhand laat sit het; hoog bo elke mag en gesag, elke krag en heerskappy, en wat daar ook al sprake van mag wees - nie net in hierdie bedeling nie, maar ook in die bedeling wat kom. Here God, U het alles aan Hom onderwerp, Hom bo alles verhef en Hom aangestel as hoof van die kerk. Die kerk is Sy liggaam, die volheid van Hom wat alles in almal vervul (Ef.1:15-23).

Sal U die kerk as 'n huis van gebed herstel sodat die kerk in gebed sal volhard met waaksaamheid en dankbaarheid (Kol.4:2). Dag en nag bid ons met ons hele hart tot U om aan te vul wat die kerk nog aan hul geloof ontbreek. Mag U ons liefde vir mekaar en vir alle mense laat groei en oorvloedig maak. Maak ons innerlik sterk dat ons onberispelik en heilig voor U, ons Vader, sal staan wanneer ons Here Jesus kom saam met al Sy heilige engele (1Tess.3:9-13). Vader, ons bid met vertroue dat U wat die goeie werk in ons begin het, dit end-uit sal voer en dit sal voleindig op die dag wanneer Christus Jesus kom (Fil.1:6).

3.16 Vir die vrees van die Here

Here God Almagtig, U is groot, al die lof kom U toe, ontsagwekkend is U bo alle gode (1Kron.16:25). Here, U vra vir gehoorsaamheid, dat ons U met ons hele hart sal dien en sal let op die groot dinge wat U vir ons gedoen het (1 Sam.12:20-24).

Wysheid begin met die dien van die Here; almal wat dit doen, het ware insig (Ps.111:10). Here, U belowe dat as ons wysheid kortkom, U dit vir ons sal gee, ons vra vir wysheid (Jak.1:5) en dat U ons sal leer om U te vrees. Dit is die Here wat sorg vir dié wat Hom eer, vir dié wat op sy mag vertrou om hulle van die dood te red en hulle in die lewe te hou in hongersnood. Ons vertrou op U Here: U is ons hulp en ons beskerm (Ps.33:18-22). Die Engel van die Here slaan sy laer op rondom dié wat die Here dien, en red hulle. Ons wil kom en ondervind en sien dat U goed is! Dit gaan goed met die mens wat by U skuil. Wie U dien, het geen gebrek nie (Ps.34:8-10).

Vader, ons bid dat almal in ons gemeenskap en ons land U sal vrees, laat die hele aarde die Here vrees, laat al die bewoners van die wêreld vir Hom ontsag hê (Ps.33:8). Mag U Gees van wysheid en verstand, die Gees van raad en sterkte, die Gees van kennis en van die vrees van die HERE, KRAGTIG OP ONS RUS (Jes.11:2 Ou Vertaling). Mag die mense in ons gemeenskap en ons land kies om U te vrees. U het ons verootmoedig en ons laat hongerly, om aan ons bekend te maak dat die mens nie van brood alleen lewe nie, maar dat die mens lewe van alles wat uit die mond van die HERE uitgaan. U het ons onderrig soos 'n man sy seun onderrig, sodat ons U kan leer vrees (Deut.8:3-6). Leer ons, HERE, U weg: ons sal in U waarheid wandel; verenig ons harte tot die vrees van U Naam (Ps.86:11 Ou Vertaling). Help ons om weg te bly van die kwaad en te doen wat goed is, om vrede te soek dit na te jaag (Ps.34:15). Ons kies dan vandag om net vir U te dien en te vrees (Jos.24:15).

3.17 Vir U plan vir gesinne en kinders

Vader van ons Here Jesus Christus, ons kniel in gebed voor U aan wie die hele gemeenskap van gesinne hul bestaan te danke het (Ef.3:14,15).

Aangesien alle gesinne hulle oorsprong by U het, vra ons dat U die gesinne in die wêreld sal heelmaak en herstel. Ons erken en bely dat meeste van die pyn wat gesinne beleef, voortspruit uit ons eie sondige weë. Ons bely dat ons nie geleef het volgens U standarde in ons huwelike, in die opvoeding van ons kinders en in die versorging van die wese en weduwees nie (Jes.1:23). Ons het U opdrag geignoreer dat mans hul vroue moet liefhê en versorg soos Jesus die kerk versorg en dat vrouens hul mans moet respekteer en aan hul onderdanig moet wees soos die kerk aan Jesus onderdanig is (Ef.5:22-33; 1Pet.3:7).

Deur U bloed kan daar weer versoening kom (2Kor.5:18). Wees ons genadig. Ons bely ook dat ons as kinders ongehoorsaam aan ons ouers is en dat ons hulle nie eerbiedig soos U ons beveel het nie (2Tim.3:2; Eks.20:12). As pa's en ma's het ons nie die regte voorbeeld vir ons kinders gestel ten opsigte van ons geestelike lewens nie. Ons is die oorsaak dat hulle struikel en opstandig teenoor ons optree. Ons het nagelaat om hulle van U te vertel en U daardeur van U eer beroof. Hulle het ontrou teenoor U geword en teen U gerebelleer (Ef.6:4-6; Ps.78:4-8). Ons het U reiniging en heling nodig, kom en was ons gesinne met U Woord (Ef.5:26).

Verlos ons van die Bose, verwyder alle wortels van bitterheid, haat en onvergewensgesindheid onder ons. Maak ons verhoudings met mekaar mooi.

3.18 Vir Genesing deur Christus

Ek wil die Here loof met alles wat in my is en nie een van Sy weldade vergeet nie. Dis Hy wat al my sonde vergeef en al my siektes genees! (Ps.103:2-3). U is God, ons GENEESHEER (Eks.15:26). U het U Seun, Jesus Christus, aan ons gegee. Hy het ons lyding op Hom geneem en ons siektes het Hy gedra. Oor ons oortredings is Hy deurboor; oor ons sondes is Hy verbrysel. Die straf wat vir ons vrede moes bring, was op Hom en deur Sy wonde het daar vir ons genesing gekom. U het al ons sondes op Hom laat afkom. Omdat Hy die sondes van baie op hom geneem het, kan Hy nou vir oortreders bid (Jes.53:1-12).

U het Hom met die Heilige Gees gesalf en met krag, om die evangelie van die koninkryk te verkondig en om elke soort siekte en kwaal onder die volk gesond te maak, asook bevryding van bose magte (Matt.4:23-24; Hand.10:38). Die Son van Redding het waarlik opgekrom met genesing in sy strale (Mal.4:2).

Here Jesus Christus, ons gemeenskap het U helende aanraking nodig. Maak ons tog gesond; ons het teen U gesondig (Ps.41:4). Genees die gebrokenes van hart, bevry diè wat deur sonde opgesluit is en diegene wat deur verslawing of self-opgelegte bande, korrupte gedagtes of geestelike vestings gevange gehou word (Jes.61:1). U

het belowe dat as ons, oor wie U Naam uitgeroep is, berou toon en bid en vra na U wil en terugdraai van ons bese weë, sal U luister uit die hemel, ons sonde vergewe en ons land genees (2Kron.7:14). Ons volk het U genesing nodig. Vervul U belofte en bring genesing as ons ons voor U verootmoedig.

3.19 Vir Vervolging en lyding

Here Jesus Christus, U het ons geroep om in U voetspore te volg, selfs in lyding. U is beledig en vals beskuldig, maar het nooit teruggedeins nie en die wraak aan Hom wat regverdig oordeel, oorgelaat (1Pet.2:21-23). U lyding was nodig sodat ons vergifnis van sonde kon ontvang (Luk.24:46-47), en deurdat U gehoorsaam en gewillig was om te ly, is ons regverdig verklaar. U noem die wat vervolg word omdat hulle doen wat reg is; geseënd, en verseker ons van 'n groot beloning in die hemel wanneer ons diegene wat ons vervolg en beledig ter wille van U naam, seën (Matt.5:10-12). Help ons om ons ook met dië gedagte te bewapen en so volgens U wil te lewe (1Pet.4:1,19), en sou dit lyding insluit, dat ons soos die vroeë kerk, ons daarin verheug dat ons bevoorreg was om ter wille U Naam te ly (Hand.5:41; Fil.1:29; 2Tess.1:5-6). Help ons om die doel van lyding te verstaan, siende dat Paulus verduidelik dat almal wat in Christus Jesus toegewy aan God wil lewe, ook vervolg sal word (Rom.8:17; 2Tim.3:12). Help ons om soos Paulus te sê: "Al wat ek wens, is om Christus te ken, die krag van Sy opstanding te ondervind en deel te hê aan Sy lyding deur aan Hom gelyk te word in Sy dood." (Fil.3:10-11).

Ons bid dat U diegene, wat ter wille van U Naam ly en vervolg word, sal oprig, bemoedig en versterk (1Pet.5:10). Gee ons vrymoedigheid om U Woord te verkondig, al word ons gedreig of vervolg (Hand.4:29). Help ons om gehoorsaamheid te leer deur dit wat ons ly (Heb.5:8).

Ons bid dat diegene wat U kerk vervolg, 'n ontmoeting met U sal hê en vra dat U hulle genadig sal wees.

3.20 Vir ons Regering

Here, U verander omstandighede en U stel konings aan en vervang hulle. (Dan.2:21). Vader, met smeking, voorbidding en danksegging nader ons U troon vir konings, ons regering, en vir almal wat gesag uitoefen, sodat ons 'n rustige en stil lewe kan lei in volkome toewyding aan U en in alle eerbaarheid. So is dit goed en aanneemlik vir U, ons Verlosser, wat wil hê dat alle mense gered word en tot kennis van die waarheid kom (1Tim.2:1-4). Ons regeerders se wil staan onder U gesag, Here. Lei U dit soos 'n stroom water waarheen U verkies (Spr.21:1). Verwyder die goddelose raadgewers uit die teenwoordigheid van ons regeringsleiers, die president, ministers en ander leiers sodat hulle regverdig kan regeer (Spr.25:5). Mag hierdie regering regverdig regeer sodat ons veilig kan woon (Spr.29:4). Laat ons regering reg laat geskied aan arm mense sodat ons stabiliteit mag hê (Spr.29:14).

Toon aan die president, die kabinet en al die regeringsleiers wat goed is en wat U van hulle verlang. Werk in hulle harte sodat hulle reg sal laat geskied, dat hulle liefde en trou sal bewys, en dat hulle bedagsaam sal lewe voor ons God (Miga.6:8). Here God, vul die harte van ons regeerders met liefde en getrouheid wat hulle sal bewaar sodat ons veiligheid en vrede kan beleef (Spr.20:7). Stuur asseblief U Heilige Gees in ons regeringsgeboue en plekke waar ons leiers vergader om wette en besluite te maak en oortuig hulle van sonde, geregtigheid en oordeel (Joh.16:8-11).

As kerk bid ons dat U die regering sal bewaar teen die magte van hierdie donker wêreld en dat hulle nie betrokke sal raak in toordery, afgodery of enige vorm van okkultiese bedrywighede nie. As kerk weerstaan ons die duiwel waar hy probeer om die regering aan te val, versoek en mislei (Jak.4:7). Ons bid vir 'n kerk wat U Woord profeties sal uitdra aan die regering; 'n Kerk wat bereid sal wees om daarmee vol te hou, tydig en ontydig, wat sal weêrlê, bestraf, bemoedig deur met alle geduld onderrig te gee (2Tim.4:2).

3.21 Om vervul te wees met U Woord

Deur die WOORD van die Here is die hemele gemaak (Ps.33:6). Hy hou alle dinge deur Sy MAGSWOORD in stand (Heb.1:3). U WOORD is lewend en kragtig. Dit is skerper as enige swaard met twee snykante en dring deur selfs tot die skeiding van siel en gees en van gewigte en murg. Dit beoordeel die bedoelings en gedagtes van die hart (Heb.4:12). U WOORD is soos 'n vuur, soos 'n hamer, waarmee klippe stukkend gebreek word (Jer.23:29). U WOORD is die swaard van die Gees (Ef.6:17) en so sal elke WOORD wat uit U mond kom, ook wees: dit sal nie onverrigter sake na U toe terugkeer nie, maar dit sal doen wat U gedoen wil hê en tot stand bring waarvoor U dit gestuur het (Jes.55:11).

U, wat Uself deur die WOORD openbaar (1Sam.3:21), open ook ons verstand om die Skrif te verstaan (Luk.24:45), en gee ons deur U Gees wysheid en openbaring dat ons U kan ken (Ef.1:17). Mag U WOORD die lamp wees wat ons die weg wys, die lig op ons pad (Ps.119:105). Laat U WOORD ons op die regte pad hou (Ps.119:133). Laat ons leef van elke WOORD wat uit U mond kom (Deut.8:3; Matt.4:4). Dankie dat U WOORD ons reg snoei (Joh.15:3; Ef.5:26). Dit is U WOORD wat my genees en my aan die dood laat ontkom (Ps.107:20).

Laat U WOORD in sy volle rykdom in my bly sodat ek ander kan leer en onderrig (Kol.3:16) en die Bose kan oorwin (1Joh.2:14) Gee dat by die aanhoor van U WOORD, geloof in my sal groei (Rom.10:17).

Vestig U WOORD in ons stede en nasies, laat dit kragtig groei en versprei (Hand.19:20). "Die mens is soos gras, en al sy prag soos 'n veldblom; die gras verdor en die blom val af, maar die WOORD van die Here, dit bly vir ewig." (1Pet.1:24,25).

3.22 Om die Bose te Weerstaan

Hemelse Vader, soos U Uself al van ewigheid af voorgeneem het om deur Christus Jesus, ons Here, tot uitvoering te bring; het U deur die kerk die ryke verskeidenheid van U wysheid bekend laat word aan elke mag en gesag in die hemelruim (Ef.3:10). Ons bid dat U, wat Jesus gesalf het om die evangelie aan armes te verkondig, ook in ons gemeenskap vrylating vir gevangenes sal uitroep en herstel van gesig vir blindes en onderdrukte in vryheid sal uitstuur (Luk.4:18). U het aan U Seun alle mag in die hemel en op die aarde gegee, en voor Sy Naam sal elkeen die knie buig en elke tong erken dat Jesus Christus die Here is (Matt.28:18; Fil.2:10,11). Mag dit ook in ons gemeenskap gebeur.

Seun van God, U het juis gekom om die werk van die duiwel tot niet te maak, mag dit ook in ons gemeenskap gebeur (1Joh.3:8). Bevry ons gemeenskap van die mag van die Duisternis en plaas ons onder die heerskappy van U Seun (Kol.1:13). Ons bid vir ons gemeenskap dat U die oë van ongelowiges sal oopmaak, sodat hulle hulle van die duisternis tot die lig, en die mag van die Satan tot God, kan bekeer. Dat hulle sondes ook vergewe sal word deur in U te glo en sal deel word van die volk van God (Luk.9:1-2; Matt.28:18,19; Hand.26:17,18). Daarom bid ons, God van vrede, dat U Satan spoedig onder ons voete sal verpletter (Rom.16:20). Dankie dat ons ons met U wapens kan klee, en op ons pos kan bly ondanks die listige aanslae van die duiwel. Ons stryd is nie teen vlees en bloed nie, maar teen elke mag en gesag, teen elke gees wat heers oor hierdie sondige wêreld, teen elke bose gees in die lug (Ef.6:10-18; Jak.4:7; 1Pet.5:9). Ons verklaar dat Hy wat in ons is, groter is as die duiwel wat in die wêreld is (1Joh.4:4).

3.23 Vir die openbaring van die Vaderskap van God

Ewige Vader, U is ons Skepper, wat ons gemaak en gevorm het (Deut.32:6). Ons verklaar: U is ons Vader (Ps.89:27; Jes.63:16). Here, ons is klei en U het ons gevorm, ons is almal die werk van U hande (Jes.64:8). Daarom, saam met die menigte van nasies in die wêreld verklaar ons: "Ons glo in God die Vader, die Almagtige, Skepper van hemel en aarde." Dankie vir U verbondsbelofte dat U vir ons 'n Vader is en ons U seuns en dogters is (2Kor.6:18). Openbaar Uself aan die Kerk en aan die gemeenskap as die Vader, die Een van wie elke goeie gawe en elke volmaakte geskenk kom en wat nie verander of verduister nie (Jak.1:17).

Ons wil U, wat van die begin af daar was, ken, die Een wat is en was en wat vir altyd sal wees (1Joh.2:14; Joh.17:1-4). Ons begeer om net soos Abraham en Moses, in 'n persoonlike verhouding van aangesig tot aangesig met U te leef. Vader, soos 'n seun sy vader eer en 'n slaaf sy eienaar, wil ons U eer en respekteer (Mal.1:6). Net soos U Seun U voor die hele mensdom verheerlik het, begeer ons om U voor die mensdom te verheerlik (Joh.17:4).

Openbaar Usel as 'n Vader vir weeskinders en 'n beskermmer van die reg van weduwees (Ps.68:6). Die Gees wat aan ons gegee is, maak ons nie tot slawe nie en laat ons nie weer in vrees lewe nie; nee, ons het die Gees ontvang wat ons tot kinders van God maak en wat ons tot God laat roep: "Abba, Vader"! (Gal.4:5-7; Rom.8:15,17). Ons begeer om ware aanbidders te wees; daarom, leer ons Vader, om U deur die Gees en in waarheid te aanbid (Joh.4:23).

3.24 Vir die redding van ongelowiges (die wat nog ongered is)

Vader, laat U koninkryk kom, laat U wil ook op die aarde geskied, net soos in die hemel (Matt.6:10). Ons bid vir die redding van mense uit elke nasie, stam, volk en taal – sodat 'n groot menigte eendag voor die troon en voor die Lam sal staan (Openb.7:9).

Ons bid dat die nasies van die wêreld, asook ons ongeredde vriende en familie met U sal versoen, want dit is nie U wil dat die goddelose moet sterf nie, maar dat hulle hul sal bekeer van hulle verkeerde dade en dat hulle bly lewe (Eseg.18:23).

Here Jesus, U is die Lam van God wat die sonde van die wêreld vergewe en ons van alle ongeregtheid reinig (1Joh.1:9). Bekeer U die nasies van die wêreld tot U, dan sal hulle bekeer wees (Klaagl.5:21). Deur die werking van die Heilige Gees, bid ons dat U die mense in ons gemeenskap sal oortuig van sonde, geregtigheid en oordeel (Joh.16:8). Mag duisende in U kerk reageer wanneer U vra: "Wie kan Ek stuur?" Maak hulle gewillig om te gaan. Laat hulle net soos Jesaja sê: "Hier is ek! Stuur my!" (Jes.6:8). Ons sien dat die oes groot is, maar die arbeiders min. Daarom bid ons tot U, die Here van die oes, stuur arbeiders uit vir U oes (Matt.9:37-38). Mag Christene regoor die wêreld hulle oë oopmaak en sien dat die lande ryp is vir die oes (Joh.4:35). Gee dat die Kerk opnuut sal besef dat U ons roep om uit te gaan die hele wêreld in om die evangelie aan die hele mensdom te verkondig (Mark.16:15).

Here God, ons vra dat U saam sal getuig deur tekens en wonders, en ook deur allerhande kragtige dade en gawes van die Heilige Gees, soos U dit toebedeel het volgens U wil (Heb.2:4).

3.25 Vir U koninkryk om te kom

Vader, ons bid: laat U koninkryk kom, laat U wil ook op die aarde geskied, net soos in die hemel (Matt.6:9,10). Die mense moet weet van U krag, van U koninklike mag en majesteit. U koningskap is 'n koningskap vir alle tye, U heerskappy strek oor die geslagte heen (Ps.145:11-13).

Vergewe ons dat ons so gefokus was op ons eie behoeftes en om ons eie koninkryke te bou, terwyl U huis in puin lê (Hag.1:4-8). Open ons geestesoë dat ons kan weet watter hoop U roeping inhou en watter rykdom daar is in die heerlike erfenis wat U vir ons bestem het en hoe geweldig groot U krag is wat U uitoefen in

ons wat glo (Ef.1:18-21). Ons buig ons knieë en erken die gesag van die Naam van Jesus en dat Jesus Christus die Here is! (Fil.2:10-11).

Ons bid dat nog baie meer die Woord sal hoor en dat die saad op voorbereide harte sal val, sodat daar 'n groot oes van siele sal wees in ons generasie (Matt.13:3-23). Ons verklaar nou aan al die nasies: "Verbly julle, O poorte; wees bly, eeue-oue deure, want die magtige Koning wil ingaan!" (Ps.24:7).

Ons loof en eer U, Allerhoogste, U wat vir ewig leef (Dan.4:34). U heerskappy is 'n ewige heerskappy, dit sal nie tot niet gaan nie; U koningskap sal nie ophou nie. U heiliges, Allerhoogste God, sal die koninklike heerskappy ontvang en dit vir altyd besit (Dan.7:9,10,13,14,18). Aan U wat op die troon sit, en aan die Lam, behoort die lof en die eer, die heerlijkheid en die krag, tot in alle ewigheid!" (Openb.5:13).

3.26 Verlos ons van die Bose

Here Jesus, U het ons leer bid: laat ons nie in versoeking kom nie, maar verlos ons van die Bose (Matt.6:13). Here Jesus, deur U dood en opstanding het U elke mag en gesag ontwapen en hulle in die openbaar vertoon deur hulle as gevangenes in U triomftog mee te voer (Kol.2:15). U het verklaar dat U die kerk sal bou, en die magte van die doderyk sal nie U kerk oorweldig nie (Matt.16:18). Ons bid vir bevryding van demoniese besetting. Ons bid vir die vernietiging van beseittings en redenasies wat die verspreiding van die evangelie en die kennis van God teenstaan. Ons weerstaan die plan van Satan om volkere in duisternis te hou (2Kor.10:4; Jak.4:7). Ons bid, Here Jesus, dat U die sluier oor mense se oë sal wegneem sodat hulle hulle van die duisternis tot die lig en van die mag van die Satan tot God kan bekeer (Hand.26:17-18). U Woord verklaar dat geen dood of lewe of engele of magte of kragte of enigiets anders in die skepping ons van die liefde van God kan skei nie (Rom.8:38-39). Dankie Here, dat U verklaar dat U 'n deur vir die evangelie oopgesluit het en niemand kan dit weer toesluit nie. Ons bid vir die verspreiding van die evangelie na alle nasies (Openb.3:8). Verhinder die beseitting wat geweld en dood veroorsaak. Verbreek die greep van slawerny en dwingelandy. Vervul ons met U Gees om vreesloos en getrou U Woord te verkondig (Hand 1:8). Gee ons 'n gees van welwillendheid en van berou sodat ons kan huil oor die wat verlore gaan (Sag.12:10).

Aan U behoort die koninkryk en die krag en die heerlijkheid tot in ewigheid. Ons verklaar aan die nasies: "Verbly julle, poorte, wees bly, eeue-oue deure, want die magtige Koning wil ingaan!" (Ps.24:7).

3.27 Vir die armes en behoeftiges

Vader, ons bid vir al die armes en behoeftiges in ons gemeenskap en in ons land. U Woord leer dat daar altyd armes in die land sal wees, en daarom het U ons beveel om vrygewig te wees teenoor ons medemens wat in nood en arm is (Deut.15:11).

Here, laat die geringes uit die stof opstaan en hef die armes op van die ashoop af (1Sam.2:8). Omdat U die toevlug van die hulpelose is, sal daar niks kom van die bouse planne teen hulle nie (Ps.14:6). Sal U asseblief luister na die wat swaarkry en hulle nie teleurgestel laat in hulle verwagting nie (Ps.34:6). Here, wie is soos U wat die swakke bevry van dié wat sterker is, die swakke en die arme van dié wat hom beroof? (Ps.35:10). U beveel ons om reg te laat geskied aan die mens in nood en aan die weeskind, 'n regverdige uitspraak vir die hulpelose en die behoeftige te lewer, die mens in nood en die arme te bevry en hulle uit die mag van die goddelose te red (Ps.82:3-4). Vader, U wil is dat die grond genoeg kos vir die armes sal lewer, maar waar daar nie wet en orde is nie, word die kos van hulle af weggevat. Beskerm hulle asseblief, Vader (Spr.13:23). Ons bid vir die kerk en die gemeenskap om ruim te gee vir die armes, want wie hom oor 'n arm mens ontferm, gee 'n lening aan die Here en Hy sal hom ten volle vergoed (Spr.19:17).

Ons bid dat meer Christene sal verstaan dat 'n regverdige mens besorg is oor die reg van arm mense (Spr.29:7) en sal praat vir dié wat self nie hulle sê mag sê nie, en opkom vir die reg van dié wat ten gronde gaan en reg sal laat geskied aan die armes en ellendiges (Spr.31:9). Gee ons 'n gewilligheid en begeerte om ons kos met die wat honger is, te deel en skuiling te bied aan die wat dit nodig het en klere te gee vir die naaktes (Jes.58:7). Mag die evangelie aan hulle verkondig word (Matt.11:5) en laat die armes U Naam prys (Ps.74:21).

3.28 Vir die kerk

Ons bid tot God, die bron van alle standvastigheid en bemoediging, dat ons eensgesind onder mekaar sal wees soos Christus Jesus dit wil hê. Dat ons almal eensgesind uit een mond lof kan toebring aan God, die Vader van ons Here Jesus Christus. Help ons om mekaar te aanvaar soos Christus ons ook aanvaar het, tot eer van God (Rom.15:5-7). Mag U, Here, die bron van hoop, ons deur ons geloof met alle vreugde en vrede vervul, sodat ons hoop al hoe sterker kan word deur die krag van die Heilige Gees! (Rom.15:13).

Vader van ons Here Jesus Christus, aan U kom al die lof toe! U is die Vader wat Hom ontferm en die God wat in elke omstandigheid moed gee. In elke moeilikheid bemoedig U ons. Daarom kan ons weer ander bemoedig met dieselfde bemoediging waarmee U ons bemoedig (2Kor.1:3-5). Ons bid tot God dat Christene niks verkeerds sal doen nie (2Kor.13:7). Here Jesus, ons bid vir alle Christene dat Christus in hulle gestalte sal kry (Gal.4:19). Ons kniel in gebed voor U, Vader aan wie die hele gemeenskap van gelowiges in die hemel en op die aarde sy bestaan te danke het. Ons bid dat U deur U Gees uit die rykdom van U heerlijkheid aan ons die krag sal gee om innerlik sterk te word, dat Christus deur die geloof in ons harte sal woon en dat ons in die liefde gewortel en gegrondves sal wees. Mag ons in staat wees om saam met al die gelowiges te begryp hoe wyd en ver en hoog en diep die liefde van Christus strek. Mag ons U liefde ken, liefde wat ons verstand te bowe

gaan, en mag ons heeltemal vervul word met die volheid van God. Aan U wat deur U krag wat in ons werk, magtig is om oneindig meer te doen as wat ons bid of dink, aan U kom die eer toe, in die kerk, deur ons verbondenheid met Christus Jesus, deur al die geslagte heen tot in alle ewigheid. Amen (Ef.3:14-21).

3.29 Vir die kerk

Vader, ons bid vir al die gelowiges dat wanneer ons praat, God ons die woorde sal gee dat ons die geheimenis van die evangelie met vrymoedigheid kan bekendmaak (Ef.6:19). Ons bid dat God vir ons 'n deur vir die Woord oopmaak sodat ons die geheimenis van Christus kan verkondig. Ons bid dat ons dit duidelik sal verkondig soos dit ons opgelê is (Kol.4:3-4). Vader, ons stry saam met al die gelowiges dat U die mense wat die evangelie verkondig, veilig sal hou tussen al die ongelowiges en dat hulle woorde aanvaarbaar sal wees vir almal wat dit aanhoor (Rom.15:30-32). Ons bid dat almal wat in diens staan van Christus Jesus, staande mag bly, geestelik volwasse en in alles volkome gehoorsaam aan die wil van God sal wees (Kol.4:12). Here, die Gees wat U ons gegee het, maak ons immers nie lafhartig nie, maar vul ons met krag, liefde en selfbeheersing (2Tim.1:7). Vader, ons bid dat ons sal volhard in die gebed, waaksaam en dankbaar sal wees (Kol.4:2). Ons bid vir 'n kerk wat dag en nag tot U sal roep en dat U dan aan ons reg sal doen (Luk.18:7;1Tess.3:10). Dankie Vader, dat ons daarvan oortuig kan wees dat U, wat die goeie werk in ons begin het, dit end-uit sal voer en dit sal voleindig op die dag wanneer Christus Jesus kom. Ons gebed is dat ons liefde al hoe meer sal toeneem in begrip en fyn aanvoeling, sodat ons die dinge sal kan onderskei waarop dit werklik aankom. Dan sal ons op die dag wanneer Christus kom, onberispelik en sonder blaam wees, en deur Jesus Christus sal ons geheel en al in die regte verhouding met God wees, tot Sy lof en eer (Fil.1:6-11).

3.30 Vir die kerk

Here, omdat U naby is, sal ons oor niks besorg wees nie, maar in alles ons begeertes deur gebed en smeking en met danksegging aan U bekendmaak. En mag die vrede van God wat alle verstand te bowe gaan, oor ons harte en gedagtes die wag hou in Christus Jesus (Fil.4:5-7). Here Jesus, as die kerk bid ons dat U in elke behoefte van ons ryklik voorsien volgens U wonderbaarlike rykdom in Christus Jesus (Fil.4:19-20). God, U wat saad verskaf om te saai en brood om te eet, sal U ook aan ons saad gee en dit laat groei en 'n ryk oes oplewer. Ons bid dat U ons in alles ryk genoeg sal maak om by elke geleentheid vrygewig te kan wees en dat ons vrygewigheid tot gevolg sal hê dat U gedank word (2Kor.9:10-11).

Ons vra dat U deur al die wysheid en insig wat die Gees gee, U deur U kerk sal laat ken, sodat ons tot U eer sal lewe deur net te doen wat U verlang. Mag ons vrugte dra deur goeie werke en toeneem in die kennis van God (Kol.1:9-10).

Daarom bid ons ook altyd dat U ons waardig sal maak vir die lewe waartoe U ons geroep het, en deur U krag ons liefde vir die goeie en die werk van die geloof volkome sal maak. Ons bid dit sodat die Naam van ons Here Jesus deur die kerk verheerlik sal word (2Tess.1:11-12). Vader, ons bid ook dat U ons van verkeerde en slegte mense sal verlos. U is getrou; U sal ons versterk en ons van die bose bewaar. Rig ons gedagtes op die liefde van God en die volharding van Christus! (2Tess.3:1-5).

3.31 Jesus Christus, ons Advokaat by God

Hemelse Vader, U is die Skepper van al die mense. (Gen.5:2) Ons erken dat ons almal deur die een mens Adam gesondig het en nie deel aan U heerlijkheid het nie. (Rom.3:23; 5:12) Ons erken dat die dinge waarmee ons sondige natuur hom besig hou vyandskap teen U is en daarom kan ons nie U wil doen nie. (Rom.8:5-8) As gevolg van die sonde verdien ons die dood, (Rom.6:23) maar uit U groot liefde vir die mens en U barmhartigheid het U U Seun, Jesus Christus, gestuur om vir ons aan die kruis te sterf, en dit terwyl ons nog U vyande was! (Joh.3:16; Rom.5:8) Dankie Vader, dat omdat U dit so wou, Jesus Christus se liggaam as offer gebring is om ons vir eens en vir altyd van ons sonde skoon te was, (Heb.10:10) omdat die bloed van bulle en bokke onmoontlik ons sonde kon wegneem. (Heb.10:4-5) Hemelse Vader, ons loof U omdat U ons deur Christus met Uself versoen het en aan ons die bediening van versoening gegee het. (2 Kor.5:17-19) Ons nie meer U vyande nie, maar die bloed van Jesus Christus aan die kruis het die vrede herstel en alles op aarde met U versoen.(Kol.1:18-22)

Vader U wil is dat alle mense gered word en tot kennis van die waarheid kom, daarom het U verklaar dat daar net een middelaar tussen U en die mense is, die mens Jesus Christus. (1 Tim.2:1-6) Dankie Vader, dat ons wanneer ons sonde doen, nie bloedoffers moet bring nie, maar dat ons Jesus Christus, die Regverdige, as voorspraak by U het, want Hy sit aan U regterhand en Hy pleit vir ons. (1 Joh.2:1-2; Rom.8:34) Vader, help ons om nie langer soos die heidene te leef, wie se verstand verduister is en wat hardnekkig in onkunde volhard nie, (Ef.4:17-18) maar dat ons as U volk, U sal raadpleeg en nie mediums en spiritiste nie. (Jes.8:19)

Ons verklaar vandag dat Jesus die weg, die waarheid en die lewe is en dat niemand na U toe kom behalwe deur Hom nie (Joh.16:6) en dat daar geen ander Naam op die aarde aan die mense gegee is waardeur U wil dat ons verlos moet word nie. (Hand.4:10-12) Omdat ons glo in die Naam van Jesus Christus, ons middelaar by U, verklaar ons dat geen dood of lewe of engele of magte of teenswoordige of toekomstige dinge of kragte of hoogte of diepte of enigiets anders in die skepping ons kan skei van die liefde van God nie, die liefde wat daar in Christus Jesus ons Here is nie. Amen.

4 Bid die Name van God

4.1 Name van God die Vader

Abba Vader, Adonai (God ons Regeerder), Allerhoogste, Barmhartige en Genadige God, Bergvesting, Bron van alle standvastigheid en bemoediging, die Vader wat Hom ontferm, die Een wat wonders doen, die lewende God, Elohim (die Skeppergod; die groot EK IS; God), El-Shaddai (die Algenoegsame; Bevrediger), El-Gemuloth (die God wat vergeld), El Gibbor (Magtige God – "Champion"), El-Rôî (Die God wat sien), El Olam (God van Ewigheid), El Elyon (God die Allerhoogste), Enigste God, Enigste Heerser, God van alle vertroosting God wat alle genade gee, God aan wie al die eer toe kom, God die Bron van hoop, God van die hele wêreld, God van die hemel, God van Jakob, God van liefde en vrede, God van my lewe, God van waarheid, God wat vergeld, God wat vrede gee, Here die Allerhoogste, Here God Almagtige, Here julle Verlosser, Here my God, Here ons Skepper, Here ons Geregtheid, Here van die ganse aarde, Here van die heersers, Here wat die hemel geskep het, Here die Almagtige sal die Kroon wees, Here is my Steun, Here is my Lewe, Here is jou Swaard, Here my toevlug, Hoogste Regeerder, Hoop van Israel, Hoop van ons voorvaders, Hy wat aan sy Koning groot oorwinnings gee, Hy wat hoog en verhewe is, Hy wat vir ewig lewe (Ewige van dae), iemand wat (silwer) smelt en suiwer, Jaloers, Jah (Die Onafhanklike Een), Jahweh (Die Een wat op sy eie bestaan, die Verlossingsnaam van God; die Ewige), Jahweh-Elohay (Die Here my God), Jahweh-Elohenû (Die Here ons God), Jahweh-Elohim (God die Skepper), Jahweh-Elyon (Allerhoogste), Jahweh-Osenu (Die Here ons Skepper), Jahweh-Jireh (God sal voorsien; Voorsiener), Jahweh-Mekaddishkem (Die Here wat julle heilig), Jahweh-Makkeh (die Here wat straf), Jahweh-Nissi (die Here my Banier), Jahweh-Rohi (die Here my Herder), Jahweh-Ropheka (die Here wat jou gesond maak), Jahweh-Shalom (die Here gee rus; God is vrede), Jahweh-Shammah (die Here is daar; die Oorvloedige; die Ewig teenwoordige Een), Jahweh-Tsebaoth (die Here van die leërskaer), Jahweh-Tsidkenu (die Here verskaf reg aan ons; die Here, ons Geregtheid), Jahweh-Goaleka (die Here jou Verlosser), jou Bewaarder, jou Ewige Lig, jou Koning, jou Maker, jou Skaduwee, jou Skild, Koning, Koning oor al die gode, Koning in al sy prag, Koning van die konings, Koning oor die hele land, Magtige God van Jakob, Magtige Koning, Muur van Vuur, my Beminde, my Beskermer, my Helper en my God, my Helper in nood, my Here en my God, my Hoop, my Hulp, my Lamp, my Lied, my Krag, my Maker, my Redder, my Skild, my Sterk Verlosser, my Veilige Vesting, ons Regter, ons Formeerder, Ontfermer (Die Here jou ...), die Ewige van Dae, Reën vir die grasveld, Rots, Rots om na toe te vlug, Rots van struikeling, Skaduwee teen die hitte, Skeppergod, Skepper van alles en almal, Skepper van die hele aarde, Skild, Skild wat jou Hulp is, Skuilplek teen die stortbuie, Son en Skild, Son van redding, Sterk Toring, Toevlug, Toevlug vir sy volk, Toevlug vir die armes, Toevlug vir die behoeftiges, Een Vader, My Vader, Julle Vader, Ons Vader, Hemelse Vader, God die Vader, God ons Vader, Heilige Vader, Regverdige Vader, Vader van die hemelligte, Vader aan wie al die

eer toekom, Vangnet en 'n Strik, Veilige Beskutting, Verterende Vuur, Verkwikker, Vertroue.

4.2 Name van God die Seun

Aanvoerder van die leër van die Here, Advokaat, Afstammeling van Dawid, Alfa en Omega, Arm van die Here, Beeld van God, Beeld van die Onsienlike God, Bedienaar van die heiligdom, Begin en Einde, Belangrikste klip in die gebou (Steen), Beloner, Bewaker van julle lewe Borg (van 'n beter verbond), Bruidegom (man), Blink Môrester, Christus, Christus Jesus, Christus die Here, Christus alles en in almal, Christus die Krag van God en die Wysheid van God, Christus ons lewe, die Amen, die Apostel en Hoëpriester, die Begin en Voleinder van die geloof, die Bron van ewige saligheid, die Brood wat God gee, die Brood wat lewe gee (die Brood van die lewe), die Dienaar, die Een wat deurbaar is, die Eerste en die Laaste, die Eerste van baie broers, die Eerste verhewe bo die hele skepping, die Ewige Lewe, die Fondament, die Heerlikheid van God, die Heilige van God, die Hoof van elke man, die Klip wat deur die bouers afgekeur is, die Koning van Israel, die Krag van God, die Laaste Adam, die Lam in die middel van die troon, die Lam is sy lamp, die Lam van God, die Lam wat geslag is, die Lam wat vlekkeloos en sonder liggaamsgebrek is, die Leeu van Juda, die Lewende, die Trots van sy hele familie, Een Herder, Een wat sal heers, Eersgeborene uit die dood, Eersteling uit dié wat gesterf het, Eienaar van die huis, EK IS, Ek is...die Brood van die lewe, die Lig vir die wêreld, die Deur vir die skape, die Goeie Herder, die Opstanding en die Lewe, die Weg, die Waarheid en die Lewe, die (Ware) Wynstok, die Afstammeling, die Nakomeling van Dawid, Engel van God, Enigste Seun van die Vader, Erfgenaam van alles, Geestelike Rots, Geliefde, Geliefde Seun, Geloofwaardige en Ware Getuie, Geneesheer, Getroue en Betroubare, Gesalfde, God, God geopenbaar in die vlees, Goeie Herder, Goeie Leermeester, Groot Herder van sy kudde, Groot Hoëpriester, Groot Lig, Groot Profeet, Heerser van Israel, Heerser oor die konings van die aarde, Heilig(e), Here, Here van die dooies en die lewendes, Here van die heersers, Here van die hemele, Here van almal, Hoof bo alle dinge, Hoof van die liggaam, Hy deur wie God alles geskep het, Hy wat kom, Immanuel (God met ons), Instandhouer van alle dinge, Jesus, Jesus van Nasaret, julle Hoop op die heerlikheid, Jesus Christus die Regverdige, Jesus Christus, gister en vandag dieselfde en tot in ewigheid, Klip waaroor 'n mens struikel, Koning van die Konings, Koning van die nasies, Kosbare Hoeksteen, Leermeester, Leeu uit die stam van Juda, Leidsman tot die lewe, Leidsman en Verlosser, Leidsman tot die verlossing, Leier, Lewende Brood, Lewende Steen, Lewendmakende Gees, Lig, Lig van die mense, Lig van die wêreld, Losprys, Lofwaardig vir ewig, Magtige God, Man deur God aangewys, Man van Smarte, Meester, Messias, Middelaar, Middelaar van 'n beter verbond, Middelaar van die nuwe verbond, Môreson vanuit die hoogte, My Regverdige Dienaar, Onverganklike, Onsienlike, Enigste God, Oorsprong, Ons Groot God, Ons Hoop, Ons Paaslam, Ons Vrede, Onuitspreeklike Gawe, Opperherder, Opstanding en die Lewe, Priester vir ewig, Profeet, Rabbi, Redder van die wêreld, Regter oor lewendes en dooies, Regverdige, Regverdige Regter,

Regverdige Spruit, Saad van Dawid, Saad van die vrou, Saad van Abraham, Seun van die Koning, Skepper van alles, Sterk Verlosser, Seun, Seun van die mens, Seun van die Vader, Seun van God, Seun van God die Allerhoogste, Seun van Maria, Son van redding, Ster uit Jakob, Takkie uit die Stomp van Isai, Teken, Timmerman, Uitverkorene, Uitverkore Hoeksteen, Ewige Vader, Verlosser/Bevryder, Verbondsengel, Versoening vir ons sondes, Voleinder van ons geloof, Voorbidder, Hoëpriester vir ewig, Vriend van tollenaars en sondaars, Ware Brood uit die hemel, Ware Lig, Wonderbare Raadsman, Woord, Woord van die lewe, Woord van God, Wysheid van God, Silo, Sy enigste Seun, die Heerlikheid van God.

4.3 Name van God die Heilige Gees

Die Gees van die Here God, U Goeie Gees, U Heilige Gees, Sy Getuie, die Voorspraak wat van die Vader kom, 'n ander Trooster/Voorspraak, 'n dubbele deel van u Gees, God, Here, Ewige Gees, (Alomteenwoordige) Gees, (Alwetende) Gees, (Almagtige) Gees, Voorbidder, Strome lewende water, Volop water op die dorsland, Strome op die droë grond, Vuur, Salwing, Seël, Duif, Voorspraak, Helper, Krag van die Allerhoogste, Krag van die Here, Krag van Bo, Getuie, Vinger van God, die Nuwe Gees (die Gees wat nuwe lewe gee), Lewensasem, die Oë van God, die teenwoordigheid van God, die Gees van Wysheid, die Gees van Vryheid, die Gees van die Here, die Gees van Insig, die Gees van Raad en Sterkte, die Gees van Kennis en Eerbied vir die Here, die Gees van Genade en Smeking, die Gees wat lewe gee, die Gees van die Vader, die Belofte van die Vader, die Gawe van God, die Gees van Hom wat Jesus uit die dood opgewek het, die Gees van die Lewende God, die Heilige Gees van God, die Gees van Jesus, die Gees van Christus, die Gees van sy Seun, die Sewevoudige Gees van God, die Gees van Heiligheid, die Gees van Liefde, die Gees van Waarheid, die Gees van Krag, die Gees van Selfbeheersing, die Gees van Lewe, die Gees van Aanneming, die Gees van Geloof, die Gees van Lof(prysing), die Gees van Wysheid en Openbaring van Kennis van Hom, die Gees wat God belowe het, die Gees van Genade, die Gees van Heerlikheid, die Gees wat oor die waters gesweef het, die Waarborg van dit wat God belowe het, die Gees wat verseël, die Gees wat rus gee, die Gees wat Christus bevestig, die Gees wat oorvloedig op ons uitgestort is, die Hand van God.